

საქართველოს ტექნიკურ უნივერსიტეტში სტუდენტთა კონტინგენტის ფორმირებისა და მობილობის ინსტრუქცია

**მუხლი 1. სტუ-ს სტუდენტის სტატუსის მინიჭება**

1. საქართველოს ტექნიკური უნივერსიტეტის (შემდგომში – სტუ) ბაკალავრიატის საგანმანათლებლო პროგრამით სწავლის უფლება აქვს სრული ზოგადი განათლების დამადასტურებელი სახელმწიფო სერტიფიკატის მფლობელს ან მასთან გათანაბრებულ პირს, რომელმაც გაიარა ერთიანი ეროვნული გამოცდები და მოიპოვა სტუ-ში ჩარიცხვის უფლება საქართველოს კანონმდებლობით დადგენილი წესის შესაბამისად.
2. სტუ-ს ბაკალავრიატის საგანმანათლებლო პროგრამებზე ჩარიცხვა ფორმდება რექტორის ერთიანი აქტით, რომელიც გამოიცემა საქართველოს განათლებისა და მეცნიერების მინისტრის შესაბამისი ბრძანების, ჩასარიცხი პირის რეგისტრაციისას წარმოდგენილი დოკუმენტაციის, ადმინისტრაციული (საფინანსო ხელშეკრულების გაფორმება და სწავლების საფასურის გადახდა) და აკადემიური (სასწავლო ხელშეკრულების გაფორმება) რეგისტრაციის გავლის საფუძველზე, „ერთიანი ეროვნული გამოცდების ჩატარების დებულებისა და სახელმწიფო სასწავლო გრანტის განაწილების წესის დამტკიცების შესახებ“ საქართველოს განათლებისა და მეცნიერების მინისტრის 2011 წლის 18 თებერვლის №19/ნ ბრძანებით განსაზღვრული წესის შესაბამისად.
3. აზერბაიჯანულენოვანი, სომხურენოვანი, აფხაზურენოვანი და ოსურენოვანი აბიტურიენტების ჩარიცხვა, განათლების ხარისხის განვითარების ეროვნული ცენტრის მიერ სტუ-ში განსაზღვრული სტუდენტების რაოდენობის ფარგლებში, ხორციელდება „უმაღლესი განათლების შესახებ“ საქართველოს კანონის საფუძველზე.
4. მაგისტრატურაში სწავლის უფლება აქვს არანაკლებ ბაკალავრის ან მასთან გათანაბრებული აკადემიური ხარისხის მქონე პირს. მაგისტრატურაში ჩარიცხვა ხორციელდება „საერთო სამაგისტრო გამოცდების ჩატარების დებულებისა და სახელმწიფო სასწავლო სამაგისტრო გრანტის განაწილების წესის დამტკიცების შესახებ“ საქართველოს განათლებისა და მეცნიერების მინისტრის 2009 წლის 22 აპრილის №227 ბრძანების და მაგისტრატურის შესახებ სტუ-ს აკადემიური საბჭოს 2012 წლის №704 დადგენილების შესაბამისად.
5. სტუ-ს მიერ განსაზღვრულ გამოცდაში/გამოცდებში მონაწილეობის უფლება აქვს მხოლოდ იმ მაგისტრანტობის კანდიდატს, რომელმაც წარმატებით გადალახა საქართველოს კანონმდებლობით დადგენილი მინიმალური კომპეტენციის ზღვარი.
6. მაგისტრატურაში ჩარიცხვა ფორმდება რექტორის ერთიანი აქტით, რომელიც გამოიცემა მაგისტრატურაში მისაღები საერთო-სამაგისტრო და საუნივერსიტეტო სპეციალობის გამოცდების შედეგების მიხედვით შედგენილი რანჟირების დოკუმენტისა და მაგისტრანტობის კანდიდატის მიერ ადმინისტრაციული და აკადემიური რეგისტრაციის გავლის შემდეგ. აღნიშნული აქტი იგზავნება სსიპ შეფასებისა და გამოცდების ეროვნულ ცენტრსა და სსიპ განათლების ხარისხის განვითარების ეროვნულ ცენტრში ამავე პუნქტში მითითებული ბრძანებით განსაზღვრულ ვადაში. მაგისტრანტობის კანდიდატი, რომელიც არ გააფორმებს

ხელშეკრულებებს, სტუ-ში არ ჩარიცხება და მის ადგილს დაიკავებს რანჟირების დოკუმენტით დაგროვებული ქულების რაოდენობის მიხედვით მომდევნო კანდიდატი.

7. დოქტორანტურაში სწავლის უფლება აქვს არანაკლებ მაგისტრის ან მასთან გათანაბრებული აკადემიური ხარისხის მქონე პირს.
8. დოქტორანტურაში ჩარიცხვა ხორციელდება დოქტორანტურის დებულების შესაბამისად. დოქტორანტურაში ჩარიცხული პირი ვალდებულია ჩარიცხვის შესახებ რექტორის სამართლებრივი აქტის გამოსვლიდან 1 კვირაში გაიაროს ადმინისტრაციული და აკადემიური რეგისტრაცია.
9. აბიტურიენტების ხელშეწყობისა და სტუდენტების მობილობის მიზნით სტუ-ში სწავლა ერთიანი ეროვნული გამოცდების გავლის გარეშე, საქართველოს კანონმდებლობით დადგენილი წესით დასაშვებია:
  - ა) უცხო ქვეყნის მოქალაქეებისა და მოქალაქეობის არმქონე პირებისათვის, რომლებმაც უცხო ქვეყანაში მიიღეს სრული ზოგადი ან მისი ეკვივალენტური განათლება;
  - ბ) საქართველოს მოქალაქეებისათვის, რომლებმაც უცხო ქვეყანაში მიიღეს სრული ზოგადი ან მისი ეკვივალენტური განათლება და სრული ზოგადი განათლების ბოლო 2 წელი ისწავლეს უცხო ქვეყანაში;
  - გ) უცხო ქვეყნის მოქალაქეებისათვის (გარდა ერთობლივი უმაღლესი საგანმანათლებლო პროგრამის მონაწილე სტუდენტებისა და გაცვლითი საგანმანათლებლო პროგრამის მონაწილე სტუდენტებისა), რომლებიც სწავლობენ/სწავლობდნენ და მიღებული აქვთ კრედიტები/კვალიფიკაცია უცხო ქვეყანაში ამ ქვეყნის კანონმდებლობის შესაბამისად აღიარებულ უმაღლეს საგანმანათლებლო დაწესებულებაში;
  - დ) საქართველოს მოქალაქეებისათვის (გარდა ერთობლივი უმაღლესი საგანმანათლებლო პროგრამის მონაწილე სტუდენტებისა და გაცვლითი საგანმანათლებლო პროგრამის მონაწილე სტუდენტებისა), რომლებიც საქართველოს კანონმდებლობით განსაზღვრული ვადით ცხოვრობენ/ცხოვრობდნენ, სწავლობენ/სწავლობდნენ და მიღებული აქვთ კრედიტები/კვალიფიკაცია უცხო ქვეყანაში ამ ქვეყნის კანონმდებლობის შესაბამისად აღიარებულ უმაღლეს საგანმანათლებლო დაწესებულებაში.
10. მაგისტრანტობის კანდიდატების ხელშეწყობისა და სტუდენტების მობილობის მიზნით სტუ-ში სწავლა საერთო სამაგისტრო გამოცდების გავლის გარეშე, საქართველოს კანონმდებლობით დადგენილი წესით დასაშვებია:
  - ა) მაგისტრანტობის კანდიდატებისათვის, რომლებმაც უცხო ქვეყანაში მიიღეს შესაბამისი უმაღლესი განათლების აკადემიური ხარისხის დამადასტურებელი დოკუმენტი;
  - ბ) უცხო ქვეყნის მოქალაქეებისათვის (გარდა ერთობლივი უმაღლესი საგანმანათლებლო პროგრამის მონაწილე სტუდენტებისა), რომლებიც სწავლობენ/სწავლობდნენ და მიღებული აქვთ კრედიტები/კვალიფიკაცია უცხო ქვეყანაში ამ ქვეყნის კანონმდებლობის შესაბამისად აღიარებული უმაღლესი საგანმანათლებლო დაწესებულების მაგისტრატურაში;
  - გ) საქართველოს მოქალაქეებისათვის (გარდა ერთობლივი უმაღლესი საგანმანათლებლო პროგრამის მონაწილე სტუდენტებისა და გაცვლითი საგანმანათლებლო პროგრამის მონაწილე სტუდენტებისა), რომლებიც საქართველოს კანონმდებლობით განსაზღვრული

ვადით ცხოვრობენ/ცხოვრობდნენ, სწავლობენ/სწავლობდნენ და მიღებული აქვთ კრედიტები/კვალიფიკაცია უცხო ქვეყანაში ამ ქვეყნის კანონმდებლობის შესაბამისად აღიარებული უმაღლესი საგანმანათლებლო დაწესებულების მაგისტრატურაში;

დ) მაგისტრანტობის კანდიდატებისათვის, რომლებიც უმაღლეს საგანმანათლებლო დაწესებულებაში ჩაირიცხნენ ამ მუხლის მე-9 პუნქტის შესაბამისად.

დ) უცხო ქვეყნის მოქალაქეებისათვის, რომლებმაც საქართველოს უმაღლეს საგანმანათლებლო დაწესებულებაში სწავლის გაგრძელების უფლება მოიპოვეს „უმაღლესი განათლების შესახებ“ საქართველოს კანონის ამოქმედებამდე და აქვთ საქართველოში გაცემული სახელმწიფოს მიერ აღიარებული უმაღლესი განათლების დამადასტურებელი დოკუმენტი.

11. ქართულ ენაში მომზადების საგანმანათლებლო პროგრამის გავლის უფლება ერთიანი ეროვნული გამოცდების გავლის გარეშე დასაშვებია ამ მუხლის მე-9 პუნქტით განსაზღვრული პირებისათვის ბაკალავრიატის საგანმანათლებლო პროგრამით სწავლის გასაგრძელებლად. აღნიშნული პროგრამა არის 60-კრედიტიანი, მისი გავლა შესაძლებელია მხოლოდ პირველი სასწავლო წლის განმავლობაში და მისი დასრულების შემდეგ სტუ გასცემს ამ პროგრამის დასრულების დამადასტურებელ სერტიფიკატს. ქართულ ენაში მომზადების საგანმანათლებლო პროგრამის დასრულების შემდეგ სტუდენტები თავიანთი არჩევანის შესაბამისად, სწავლას აგრძელებენ სტუ-ის ქართულენოვან ბაკალავრიატის საგანმანათლებლო პროგრამაზე. მითითებული პირები სტუ-ში სწავლის გაგრძელების უფლებას მოიპოვებენ სსიპ – შეფასებისა და გამოცდების ეროვნული ცენტრის (შემდგომში – გამოცდების ცენტრი) მიერ ორგანიზებული ზოგადი უნარების გამოცდის წარმატებით ჩაბარების შემთხვევაში.

12. ამ მუხლის მე-9-მე-11 პუნქტებში მითითებულმა პირებმა სტუ-ში სწავლის გაგრძელების მიზნით განცხადებით უნდა მიმართონ სტუ-ს რექტორს წერილობითი თანხმობის მისაღებად. განცხადებაში პირის მონაცემებთან (სახელი, გვარი, პირადი ნომერი/პასპორტის ნომერი, მოქალაქეობა) ერთად მითითებული უნდა იყოს ფაკულტეტი, სწავლების საფეხური, პროგრამის/სპეციალობის დასახელება, სწავლების ენა.

13. აბიტურიენტის/მაგისტრანტობის კანდიდატის/სტუდენტის განცხადებას უნდა დაერთოს პირველ დანართში ჩამოთვლილი დოკუმენტები.

14. უცხო ენაზე შედგენილი დოკუმენტები უნდა იყოს თარგმნილი ქართულ ენაზე და დამოწმებული ნოტარიუსის მიერ. დასაშვებია ნოტარიუსის მიერ დამოწმებული თარგმანის ასლების წარმოდგენა.

15. შესაბამისი კომისია გაეცნობა წარმოდგენილ განცხადებასა და თანდართულ დოკუმენტებს და გაესაუბრება აბიტურიენტს/მაგისტრანტობის კანდიდატს. სტუ უზრუნველყოფს აღნიშნული გასაუბრების ვიდეოჩანაწერის საქართველოს განათლების, მეცნიერების, კულტურისა და სპორტის სამინისტროსათვის (შემდგომში სამინისტრო) ხელმისაწვდომობას. კომისიის გადაწყვეტილებით, პირის მიერ სასწავლო პროცესში მონაწილეობის უნარის დასადგენად, შესაძლებელია მას ჩაუტარდეს ტესტირება.

16. გასაუბრების/ტესტირების დადებითი შედეგის შემთხვევაში კომისიის რეკომენდაციით გაიცემა რექტორის წერილობითი თანხმობა სტუდენტთა საერთო რაოდენობის ფარგლებში არსებულ ვაკანტურ ადგილზე აბიტურიენტის/მაგისტრანტობის კანდიდატის/სტუდენტის

მიღების შესაძლებლობის თაობაზე (სახელის, გვარის, პირადი ნომრის/პასპორტის ნომრის, ფაკულტეტის, სწავლების საფეხურის, პროგრამის დასახელების და სწავლების ენის მითითებით). თანხმობის წერილში მიეთითება აგრეთვე, სასწავლო პროცესში სავარაუდოდ რომელი სემესტრიდან შეიძლება დაშვებულ იქნეს სტუდენტი.

17. პირი, რომელიც ამ მუხლის მე-16 პუნქტით გათვალისწინებულ წერილობით თანხმობას მიიღებს, „უმაღლეს საგანმანათლებლო დაწესებულებაში ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების მიერ დოკუმენტების წარდგენისა და განხილვის წესის დამტკიცების შესახებ“ საქართველოს განათლებისა და მეცნიერების 2011 წლის 29 დეკემბრის №224/ნ ბრძანების თანახმად, უფლებამოსილია შესაბამის ვადებში განცხადებით მიმართოს საჯარო სამართლის იურიდიულ პირს – განათლების ხარისხის განვითარების ეროვნულ ცენტრს. მაგისტრანტობის კანდიდატებმა, რომლებიც უსდ-ში ჩაირიცხნენ ერთიანი ეროვნული გამოცდების გავლის გარეშე, უფლება აქვთ მიმართონ აგრეთვე სამინისტროს. სამინისტროს მიერ დადებითი გადაწყვეტილების მიღების შემთხვევაში, შესაბამისი ბრძანება ეგზავნება სტუ-ს. სტუ ვალდებულია მოახდინოს ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტის/მაგისტრანტობის კანდიდატის/სტუდენტის ჩარიცხვა ერთი წლის ვადაში ისე, რომ უზრუნველყოფილ იქნეს პირის დაშვება სასწავლო პროცესში და სწავლის შედეგების მიღწევა კანონმდებლობით დადგენილი წესით. ამ მიზნით ჩარიცხვის ბრძანებაში მიეთითება სტუდენტის სასწავლო პროცესში დაშვების თარიღის თაობაზე. კერძოდ, თუ სამინისტროს ბრძანება სტუ-ში მოვიდა სასწავლო წლის/სემესტრის დაწყებიდან არაუგვიანეს 6 კვირისა, პირი დაიშვება სასწავლო პროცესში მიმდინარე სემესტრიდან, ხოლო თუ სამინისტროს აღნიშნული ბრძანება მოვიდა სტუ-ში სემესტრის დაწყებიდან 6 კვირის შემდეგ, პირი დაიშვება სასწავლო პროცესში მომდევნო სემესტრიდან.
18. სტუ უფლებამოსილია ერთიანი ეროვნული გამოცდების/საერთო სამაგისტრო გამოცდების გავლის გარეშე ჩარიცხული სტუდენტებისათვის დააწესოს განსხვავებული სწავლის საფასური. იგივე პირობები ვრცელდება სტუ-ში მობილობით გადმოსულ სტუდენტებზე, რომლებმაც საქართველოს უმაღლესი საგანმანათლებლო დაწესებულების სტუდენტის სტატუსი მოიპოვეს ერთიანი ეროვნული გამოცდების/საერთო სამაგისტრო გამოცდების გავლის გარეშე.

## **მუხლი 2. საქართველოს ტექნიკურ უნივერსიტეტში სტუდენტთა კონტინენტის დაგეგმვის წესი**

1. სტუდენტთა კონტინენტის დაგეგმვა რთული კომპლექსური ამოცანაა, რაც მოითხოვს მრავალი, ხშირად ერთმანეთზე დამოკიდებული ფაქტორების ანალიტიკურ გააზრებასა და ოპტიმალურ გადაწყვეტას.
2. უნივერსიტეტის სტუდენტთა კონტინენტის დაგეგმვის მეთოდოლოგია და მისი გახორციელების მექანიზმი ითვალისწინებს უნივერსიტეტის მისიას, სტრატეგიული განვითარების გეგმას, რესურსებს, შრომის ბაზრის მოთხოვნებს და სხვ., რაც

უზრუნველყოფს თითოეული სტუდენტისათვის ხარისხიანი განათლების მიღების შესაძლებლობას.

3. უნივერსიტეტის სტუდენტთა კონტინგენტი წარმოადგენს ყველა საგანმანათლებლო პროგრამის აქტიური სტატუსის მქონე სტუდენტების საერთო რაოდენობას. შესაბამისად, კონტინგენტის დაგეგმვა მჭიდროდაა დაკავშირებული საგანმანათლებლო პროგრამების დაგეგმვასთან და განვითარებასთან.
4. საგანმანათლებლო პროგრამის კონტინგენტის დაგეგმვა ხდება ფაკულტეტის მიერ, მენეჯერის, პროგრამის ხელმძღვანელისა და აკადემიური დეპარტამენტების ჩართულობით; იგი მოიცავს შრომის ბაზრის (მასობრივი ინფორმაციის საშუალებებში გამოქვეყნებული ვაკანსიები, დამსაქმებელთა გამოკითხვის შედეგები და მათი წერილობითი დადასტურება სპეციალისტების მიმართ მიმდინარე და საპროგნოზო მოთხოვნებზე) კვლევის ჩატარებას და პროფესიული ასოციაციების, აგრეთვე სახელმწიფო, საერთაშორისო და არასამთავრობო ორგანიზაციების მოწოდებული ინფორმაციის გაანალიზებას. გათვალისწინებული უნდა იქნეს აგრეთვე სხვა საგანმანათლებლო დაწესებულებების მიერ იგივე კვალიფიკაციის სპეციალისტების მომზადება. მიღებული შედეგები ექვემდებარება დაზუსტებას უნივერსიტეტში სათანადო აკადემიური/სამეცნიერო და მოწვეული პერსონალის, მატერიალური, საბიბლიოთეკო, საინფორმაციო და ფინანსური რესურსების არსებობით, პრაქტიკის ობიექტებზე სტუდენტების გატარების შესაძლებლობით, აგრეთვე მოქმედ პროგრამებზე – კურსდამთავრებულთა დასაქმების (მათ შორის, მიღებული კვალიფიკაციით) სტატისტიკური მაჩვენებლებით.
5. იმ შემთხვევაში, თუ უნივერსიტეტის ჯამური დაგეგმილი კონტინგენტი გადააჭარბებს უმაღლესი საგანმანათლებლო დაწესებულებების ავტორიზაციის საბჭოს (შემდგომში ავტორიზაციის საბჭო) მიერ განსაზღვრულ სტუდენტთა ადგილების ზღვრულ რაოდენობას, უნივერსიტეტი კანონმდებლობით დადგენილი წესით მიმართავს სსიპ განათლების ხარისხის განვითარების ცენტრს სტუდენტთა ადგილების ზღვრული რაოდენობის გაზრდის თაობაზე.
6. სტუდენტთა კონტინგენტის შევსების/განახლების დაგეგმვა მოიცავს მომავალი სასწავლო წლის/სემესტრისთვის ერთიანი ეროვნული/საერთო სამაგისტრო გამოცდების ან მათ გარეშე, მობილობის ან სხვა, სწავლების საფეხურის (ბაკალავრიატი, მაგისტრატურა, დაქტორანტურა, ქართულ ენაში მომზადების საგანმანათლებლო პროგრამა) შესაბამისი, კანონმდებლობით დადგენილი წესით ჩარიცხვისათვის მისაღები ადგილების დადგენას, რისთვისაც სწავლების დეპარტამენტი წინასწარ მიმართავს ფაკულტეტებს შესაბამისი ინფორმაციის წარმოდგენის თაობაზე.
7. მისაღებ სტუდენტთა რაოდენობის განსაზღვრისას ფაკულტეტები, გარდა მე-4 პუნქტში დასახელებული ფაქტორებისა, ითვალისწინებენ აქტიური სტატუსის მქონე

სტუდენტების რაოდენობას, მათ შორის დამამთავრებელი სტუდენტების რაოდენობას და სხვა ფაქტორებს.

8. გასათვალისწინებელია ის, რომ გაცვლითი საგანმანათლებლო პროგრამის ფარგლებში საქართველოდან წასული გაცვლითი საგანმანათლებლო პროგრამის მონაწილე სტუდენტი რჩება სტუ-ს აქტიური სტატუსის მქონედ, ხოლო გაცვლითი საგანმანათლებლო პროგრამის ფარგლებში უცხო ქვეყნიდან ჩამოსული გაცვლითი საგანმანათლებლო პროგრამის მონაწილე სტუდენტი საქართველოს ტექნიკურ უნივერსიტეტს არ ეთვლება მისთვის დადგენილ სტუდენტთა საერთო რაოდენობაში.
9. ერთობლივ უმაღლეს საგანმანათლებლო პროგრამაზე მისაღები კონტინგენტის განსაზღვრისას გასათვალისწინებელია ის, რომ სტუდენტი, რომელიც ჩარიცხულია საქართველოს რამდენიმე უმაღლესი საგანმანათლებლო დაწესებულების ერთობლივ უმაღლეს საგანმანათლებლო პროგრამაზე, თითოეულ უმაღლეს საგანმანათლებლო დაწესებულებას ეთვლება მისთვის დადგენილ სტუდენტთა საერთო რაოდენობაში.
10. საქართველოს ტექნიკური უნივერსიტეტი, რომელიც ახორციელებს ერთიანი ეროვნული გამოცდების მხოლოდ ზოგადი უნარების აზერბაიჯანულენოვანი, სომხურენოვანი, აფხაზურენოვანი და ოსურენოვანი ტესტების შედეგების საფუძველზე სტუდენტების მიღებას, ვალდებულია, ავტორიზაციის საბჭოს მიერ სტუ-ისთვის განსაზღვრული სტუდენტების რაოდენობის ფარგლებში, ერთიანი ეროვნული გამოცდების მხოლოდ ზოგადი უნარების აზერბაიჯანულენოვანი, სომხურენოვანი, აფხაზურენოვანი და ოსურენოვანი ტესტების შედეგების საფუძველზე სტუდენტების ჩარიცხვისათვის, გამოაცხადოს „უმაღლესი განათლების შესახებ“ საქართველოს კანონის თანახმად დადგენილი რაოდენობის ადგილები.
11. სწავლების დეპარტამენტი უზრუნველყოფს სწავლების ყველა საფეხურზე (ბაკალავრიატი, მაგისტრატურა, დოქტორანტურა, ქართულ ენაში მომზადების საგანმანათლებლო პროგრამა) მისაღებად ფაკულტეტებიდან წარმოდგენილი ვაკანსიების და სხვა საჭირო ინფორმაციის (საბჭოს დადგენილება, მოხსენებითი ბარათი) წარდგენას აკადემიურ საბჭოზე დასამტკიცებლად.
12. აკადემიური საბჭო ითვალისწინებს უნივერსიტეტის მისიას, მოცემულ ეტაპზე საქმიანობის პრიორიტეტებს, ავტორიზაციის საბჭოს მიერ განსაზღვრული სტუდენტთა ადგილების ზღვრულ რაოდენობას და სხვა ფაქტორებს.
13. სწავლების დეპარტამენტი უზრუნველყოფს დადგენილ ვადებში სსიპ - განათლების ხარისხის ეროვნულ ცენტრსა და სსიპ - შეფასებისა და გამოცდების ეროვნულ ცენტრში წარსადგენად შესაბამისი დოკუმენტაციის მომზადებას.
14. სტუდენტთა კონტინგენტის დაგეგმვის მეთოდოლოგიის განვითარებისა და მექანიზმის სრულყოფის მიზნით საქართველოს ტექნიკური უნივერსიტეტი

განსაზღვრავს სათანადო ინდიკატორებსა და სამიზნე ნიშნულებს. (ეს პუნქტი ამოქმედდეს 2018-2019 სასწავლო წლიდან)

### **მუხლი 3. სტუდენტთა კონტინგენტის და აკადემიური ჯგუფების ფორმირება**

1. სტუ-ში სტუდენტთა ჩარიცხვის შესახებ რექტორის ერთიანი აქტის გამოცემიდან ათი დღის ვადაში ფაკულტეტის დეკანი სწავლების დეპარტამენტში წარადგენს ბრძანების პროექტს სწავლების პირველ წელზე ჩარიცხულ სტუდენტთა აკადემიურ ჯგუფებში განაწილების შესახებ.
2. აკადემიური ჯგუფი შეიძლება იყოს ძირითადი ან არჩევითი .
  - ძირითადი ჯგუფი იქმნება „სტუ-ში აკადემიური დატვირთვების გაანგარიშების და განაწილების ინსტრუქციის“ შესაბამისად, საგანმანათლებლო პროგრამების მიხედვით. ძირითადი ჯგუფი იქმნება სწავლების პირველი წლიდან, თუ ფაკულტეტზე სტუდენტთა ჩარიცხვა ხდება საგანმანათლებლო პროგრამების მიხედვით, სხვა შემთხვევაში კი – ფაკულტეტის მიერ განსაზღვრული წესით.
  - არჩევითი ჯგუფი იქმნება რომელიმე არჩევითი საგნის/მოდულის/დამატებითი სპეციალობის შესწავლის მიზნით.
  - სასწავლო კურსის განმეორებით შესწავლის მიზნით, ახალი დროებითი ჯგუფი იქმნება იმ შემთხვევაში, თუ ფაკულტეტზე არსებული რომელიმე ძირითადი ან არჩევითი ჯგუფი არ იძლევა სტუდენტების დამატების საშუალებას.
3. სტუ-ში უმაღლესი საგანმანათლებლო პროგრამებით გათვალისწინებული არჩევანი არის ნებაყოფილობითი; არჩევანის გამჭვირვალობის უზრუნველყოფისათვის შესაბამის ჯგუფებში სტუდენტების განაწილების სიები გამოიკვრება თვალსაჩინო ადგილზე. დეკანატი, ფაკულტეტის ხარისხის უზრუნველყოფის სამსახური, აკადემიური დეპარტამენტები გამოყოფენ თანამშრომლებს, რომლებიც სტუდენტებს მიაწოდებენ საჭირო ინფორმაციას, გაუწევენ კონსულტაციებს და დაეხმარებიან მათ თავიანთი პროფილის განსაზღვრაში, სასწავლო პროცესის დაგეგმვისა და მიღწევების გასაუმჯობესებლად. ბაკალავრიატში არჩევანის განხორციელების პირობები მოცემულია დოკუმენტში „სტუ-ში ბაკალავრიატის სტუდენტის მიერ საგანმანათლებლო პროგრამის კომპონენტების არჩევის წესი“.
4. არჩევითი საგნებისთვის შექმნილი ჯგუფის ნომერი განისაზღვრება ძირითადი ჯგუფის ნომრით და ქართული ანბანის ერთი ასოთი. სტუდენტი ერთდროულად შეიძლება იყოს რამდენიმე ჯგუფში, რომელთაგან ერთი ძირითადია, დანარჩენი (მათ შორის დამატებითი სპეციალობის) – არჩევითი.
5. სტუდენტთა კონტინგენტის ფორმირებისას დეკანატი თითოეულ სტუდენტზე ქმნის პირად საქმეს.
6. პირად საქმეში უნდა იყოს:
  - სტუდენტის პირადი ბარათი;
  - სტუდენტის სასწავლო ბარათი;
  - განათლების დამადასტურებელი დოკუმენტის ასლი;
  - შეფასებისა და გამოცდების ეროვნული ცენტრის მიერ გაცემული, შესაბამის ფაკულტეტზე/პროგრამაზე ჩარიცხვის სერტიფიკატი (დედანი) – ბაკალავრიატი;

- საერთო-სამაგისტრო გამოცდების შედეგების ამონაბეჭდი გამოცდების ეროვნული ცენტრის ვებგვერდიდან, გამოცდების ეროვნული ცენტრის მიერ გაცემული სერტიფიკატი (დედანი).
  - მონაცემები განათლებისა და შრომითი საქმიანობის შესახებ, სადოქტორო თემის სამეცნიერო ხელმძღვანელის/თანახელმძღვანელების რეკომენდაცია, სამეცნიერო პუბლიკაციების სია, სასწავლო და კვლევითი კომპონენტების შესრულების დამადასტურებელი დოკუმენტები (უწყისები, ოქმები) – დოქტორანტურა;
  - საფინანსო ხელშეკრულება (მათ შორის დამატებითი, არსებობის შემთხვევაში);
  - სასწავლო ხელშეკრულებები (მათ შორის დამატებითი, არსებობის შემთხვევაში);
  - პირადობის მოწმობის ასლი;
  - დაბადების მოწმობის ასლი;
  - ოთხი ფერადი ფოტოსურათი 3X4 და მისი ელექტრონული ვერსია (CD დისკზე);
  - სამხედრო დოკუმენტის ასლი (ვაჟებისთვის);
  - ჩარიცხვის ბრძანების ამონაწერი/დამოწმებული ასლი;
  - სტუდენტის სწავლების წლიდან მომდევნო სწავლების წელზე გადაყვანის ბრძანების ამონაწერი/დამოწმებული ასლი;
  - სტუდენტის აკადემიურ მოძრაობასთან დაკავშირებული ბრძანებების დამოწმებული ამონაწერები/ასლები.
7. სტუდენტის პირად საქმეში უნდა ინახებოდეს აგრეთვე სწავლის პერიოდში სტუდენტის მიერ წარმოდგენილი, სათანადოდ დამოწმებული ჯანმრთელობის ცნობები და სხვა საბუთები, სტუდენტისთვის მიცემული დახასიათებების ასლები, მისი აქტიურობის, წახალისებისა და მასზე დისციპლინური ზემოქმედების ამსახველი ინფორმაცია და სხვ.
  8. კურსდამთავრებულის პირად საქმეში უნდა ინახებოდეს აგრეთვე კვალიფიკაციის მინიჭებასთან დაკავშირებული დოკუმენტების დამოწმებული ამონაწერები/ასლები.
  9. სტუდენტის პირადი ბარათში უნდა იყოს შემდეგი რეკვიზიტები:
    - სტუდენტის სახელი და გვარი (ქართულად და ინგლისურად);
    - პირადი ნომერი;
    - დაბადების თარიღი;
    - საცხოვრებელი ადგილის მისამართი, ტელეფონის ნომერი, ელ.ფოსტის მისამართი;
    - განათლების დამადასტურებელი დოკუმენტის/დოკუმენტების მონაცემები.

#### **მუხლი 4. სტუდენტთა მობილობა**

1. სტუ-ში მობილობის წესით ჩარიცხვა ხორციელდება „უმაღლესი საგანმანათლებლო დაწესებულებიდან სხვა უმაღლეს საგანმანათლებლო დაწესებულებაში გადასვლის წესის დამტკიცების შესახებ“ საქართველოს განათლებისა და მეცნიერების მინისტრის 2010 წლის 4 თებერვლის №10/ნ ბრძანების და ამ ინსტრუქციის შესაბამისად.
2. სტუდენტთა უმაღლესი საგანმანათლებლო დაწესებულებიდან (შემდგომში – დაწესებულება) სხვა დაწესებულებაში გადასვლის (შემდგომში – მობილობა) პროცესის ადმინისტრირებას ახორციელებს საჯარო სამართლის იურიდიული პირი – განათლების ხარისხის განვითარების ეროვნული ცენტრი.



3. მობილობის უფლება აქვს პირს, რომლის დაწესებულებაში ჩარიცხვა განხორციელდა კანონმდებლობით დადგენილი წესით და ელექტრონულ პორტალზე მობილობის მსურველად რეგისტრაციის მომენტისათვის არის დაწესებულების სტუდენტი.
4. მობილობის უფლება ასევე აქვს ამ მუხლის მე-3 პუნქტით გათვალისწინებულ პირს, რომელსაც ელექტრონულ პორტალზე რეგისტრაციის მომენტისათვის შეჩერებული აქვს დაწესებულების სტუდენტის სტატუსი, ასევე პირს, რომელმაც წარმატებით დაძლია ერთიანი ეროვნული გამოცდები და რომელიც სსიპ – შეფასებისა და გამოცდების ეროვნული ცენტრის მიერ დამტკიცებულ რანჟირების დოკუმენტში მითითებულ დაწესებულებას ჩარიცხვის მიზნით ვერ მიმართავს, ვინაიდან დაწესებულება ლიკვიდირებულ იქნა უფლებამონაცვლის განსაზღვრის გარეშე, დაწესებულებამ დაკარგა ავტორიზაცია, დაწესებულებას შეეზღუდა სტუდენტთა მიღების უფლება ან საგანმანათლებლო პროგრამა აღარ ხორციელდება.
5. მობილობა შესაძლებელია განხორციელდეს უმაღლესი განათლების ერთი საფეხურის ფარგლებში. ამ პუნქტის მიზნებისათვის დიპლომირებული მედიკოსის/სტომატოლოგის/ვეტერინარის საგანმანათლებლო პროგრამები განიხილება აკადემიური უმაღლესი განათლების პირველი საფეხურის საგანმანათლებლო პროგრამასთან თავსებადად. დაუშვებელია მობილობა პროფესიული განათლების პროგრამიდან ბაკალავრიატის საგანმანათლებლო პროგრამაზე.
6. მობილობის უფლება სტუდენტს წარმოეშობა უმაღლესი განათლების შესაბამის საფეხურზე სწავლების ერთი წლის შემდეგ. სწავლების პერიოდში არ შედის ის დრო, რომლის განმავლობაშიც პირს შეჩერებული ჰქონდა სტუდენტის სტატუსი, გარდა იმ შემთხვევებისა, როდესაც დაწესებულება ლიკვიდირებულ იქნა უფლებამონაცვლის განსაზღვრის გარეშე, დაწესებულებამ დაკარგა ავტორიზაცია, ან დაწესებულების საგანმანათლებლო პროგრამა აღარ ხორციელდება.
7. სტუდენტის მობილობა შესაძლებელია განხორციელდეს კალენდარული წლის განმავლობაში ორჯერ, სსიპ განათლების ხარისხის განვითარების ეროვნული ცენტრის მიერ დადგენილ ვადაში.
8. სტუ უფლებამოსილია, აკადემიური საბჭოს მიერ მიღებული დადგენილების საფუძველზე, ცენტრის მიერ დადგენილ ვადაში ელექტრონულ პორტალზე დაარეგისტრიროს მობილობის ადგილები სწავლების საფეხურებისა და ფაკულტეტების ან საგანმანათლებლო პროგრამების მიხედვით.
9. მობილობის მსურველის სტატუსს სტუდენტი მოიპოვებს ელექტრონულ პორტალზე რეგისტრაციის შედეგად.
10. სტუდენტი უფლებამოსილია აირჩიოს არა უმეტეს 5 ფაკულტეტისა ან საგანმანათლებლო პროგრამისა. რამდენიმე ფაკულტეტსა ან საგანმანათლებლო პროგრამაზე რეგისტრაციისას, იგი ვალდებულია განსაზღვროს მათი პრიორიტეტულობა. სადოქტორო საგანმანათლებლო პროგრამებზე მობილობის უფლების მოპოვება ხორციელდება სტუ-ს დოქტორის აკადემიური ხარისხის მიმნიჭებელი სადისერტაციო საბჭოს დებულების შესაბამისად.
11. მობილობის მსურველი მოიპოვებს შესაბამისი დაწესებულების ფაკულტეტზე ან საგანმანათლებლო პროგრამაზე ჩარიცხვის უფლებას მის მიერ ელექტრონულ პორტალზე რეგისტრირებული პრიორიტეტების მიხედვით, ცენტრის მიერ დადგენილი წესით.
12. მობილობის მსურველთა ერთიანი სია, რომლებმაც მოიპოვეს შესაბამისი ფაკულტეტზე ან საგანმანათლებლო პროგრამაზე ჩარიცხვის უფლება, ქვეყნდება ცენტრის ელექტრონულ

პორტალზე, რის შემდეგაც მობილობის მსურველი უფლებამოსილია, განცხადებით მიმართოს სტუ-ს ჩარიცხვის თაობაზე. განცხადებას თან უნდა ერთვოდეს საგანმანათლებლო დოკუმენტის ასლი, რომლის საფუძველზეც პირი ჩარიცხვა დაწესებულებაში, და სტუდენტის პირად საქმეში არსებული სხვა დოკუმენტაციის ასლები.

13. მობილობის მსურველი, რომელიც სტუ-ს მიერ დადგენილ ვადაში არ მიმართავს განცხადებით სტუ-ს ჩარიცხვის თაობაზე, კარგავს აღნიშნულ ფაკულტეტზე ან საგანმანათლებლო პროგრამაზე ჩარიცხვის უფლებას, გარდა კანონმდებლობით გათვალისწინებული შემთხვევებისა.
14. სტუ ადგენს მის მიერ შეთავაზებულ საგანმანათლებლო პროგრამებთან მობილობის მსურველი პირის მიერ სხვა საგანმანათლებლო პროგრამის ფარგლებში მიღწეული სწავლის შედეგების თავსებადობას და იღებს გადაწყვეტილებას შესაბამისი კრედიტების აღიარების შესახებ.
15. აღიარებას ექვემდებარება დაწესებულების იმ პროგრამის ფარგლებში მიღებული კრედიტები, რომელზე ჩარიცხვა და სწავლება განხორციელდა კანონმდებლობით დადგენილი წესით.
16. შინაარსობრივი შესწავლის შედეგად შესაძლებელია დადგინდეს სტუდენტის მიერ გავლილი და სტუ-ს საგანმანათლებლო პროგრამით გათვალისწინებული სასწავლო კურსების შესაბამისობა, მათ სახელწოდებებში არსებული სხვაობის მიუხედავად. დასაშვებია იმ სასწავლო კურსის აღიარება, რომელიც არ არის გათვალისწინებული სტუ-ს საგანმანათლებლო პროგრამით.
17. სტუ უფლებამოსილია, კანონმდებლობით დადგენილი წესით გაიანგარიშოს სტუდენტის დატვირთვა კრედიტებით იმ საგანმანათლებლო პროგრამის შემთხვევაში, რომელიც არ არის შესრულებული ევროპული კრედიტების ტრანსფერის სისტემის შესაბამისად. სტუ უფლებამოსილია აგრეთვე დაადგინოს სტუდენტის მიერ მიღებული შეფასებების შესაბამისობა შეფასების სხვა სისტემასთან (იხ. დანართი 2).
18. თუ სტუდენტის მიერ გავლილი საგანმანათლებლო პროგრამის შეფასების სისტემა განსხვავდება მე-2 დანართში მოყვანილი სისტემებისაგან, სტუ უფლებამოსილია მობილობით გადმომსვლელი სტუდენტისაგან მოითხოვოს გამომწვევი დაწესებულებიდან დამატებითი ინფორმაციის წარმოდგენა.
19. უმაღლესი საგანმანათლებლო პროგრამის კრედიტები, რომელთა საფუძველზეც განხორციელდა კვალიფიკაციის მინიჭება, არ შეიძლება აღიარებულ იქნეს სხვა საგანმანათლებლო პროგრამის მიზნებისათვის. გამონაკლისს წარმოადგენს დიპლომირებული სპეციალისტის საგანმანათლებლო პროგრამის ფარგლებში მიღებული კრედიტების ბაკალავრიატის საგანმანათლებლო პროგრამის მიზნებისთვის აღიარება.
20. სტუ უფლებამოსილია, გასაუბრების ან გამოცდის საფუძველზე დაადგინოს მობილობის მსურველის ცოდნისა და უნარების საგანმანათლებლო პროგრამასთან თავსებადობა. ამ თავსებადობის არარსებობა პირის მობილობით ჩარიცხვაზე უარის თქმის საფუძველია.
21. აღიარება ფორმდება მიმღებ ფაკულტეტზე შექმნილი კომისიის გადაწყვეტილებით (დასკვნით). კომისია იქმნება ფაკულტეტზე დეკანის, ხარისხის უზრუნველყოფის სამსახურის უფროსის და აკადემიური დეპარტამენტის უფროსის შემადგენლობით; კომისიის გადაწყვეტილებას ამოწმებს სწავლების დეპარტამენტის უფროსი და ამტკიცებს სტუ-ს ვიცე-რექტორი. დასკვნაში მიეთითება სტუდენტის მიერ გავლილი საგანმანათლებლო პროგრამის შესაბამისობა სტუ-ს პროგრამასთან, აღიარებული კრედიტების რაოდენობა, სწავლების

წელი/სემესტრი, რომლიდანაც უნდა გააგრძელოს სტუდენტმა სწავლა. აღნიშნული წელი/სემესტრი დგინდება აღიარებული კრედიტების რაოდენობისა და გასავლელი საგნების წინაპირობების გათვალისწინებით. დასკვნაში განისაზღვრება აგრეთვე წინა სემესტრების არაღიარებული საგნების გავლის რეკომენდებული სემესტრები. სტუდენტი უფლებამოსილია გაეცნოს დასკვნის პროექტს და მონაწილეობა მიიღოს მის კორექტირებაში. დასკვნის ეს ნაწილი წარმოადგენს სტუდენტთან სასწავლო და საფინანსო ხელშეკრულებების გაფორმების საფუძველს. სტუდენტის სწავლის საფასური განისაზღვრება რეალურად გასავლელი საგნების შესაბამისი კრედიტების რაოდენობის მიხედვით. საჭიროების შემთხვევაში სტუდენტი შეიძლება გადაყვანილი იქნეს ინდივიდუალურ საგანმანათლებლო პროგრამაზე.

22. სტუ, ამ ინსტრუქციით გათვალისწინებული პირობებისა და მობილობის მსურველი სტუდენტის თანხმობის საფუძველზე, შეიმუშავებს სამართლებრივი აქტის პროექტს სტუდენტის მობილობით ჩარიცხვის თაობაზე.
23. სტუ სსიპ – განათლების ხარისხის განვითარების ეროვნული ცენტრს წარუდგენს სტუდენტის ჩარიცხვის სამართლებრივი აქტის პროექტს, რომლის საფუძველზე ცენტრი, სათანადო შემოწმების საფუძველზე, გასცემს დასკვნას პროექტში მითითებული სტუდენტების მობილობით ჩარიცხვის შესაძლებლობის შესახებ.
24. ბრძანების პროექტზე ცენტრის დადებითი დასკვნის მიღების შემდეგ, გამოიცემა სტუ-ს ბრძანება სტუდენტის მობილობით ჩარიცხვის შესახებ.
25. სწავლების დეპარტამენტის მიერ მომზადებული სტუ-ს ბრძანება სტუდენტის მობილობით ჩარიცხვის შესახებ გამოიცემა 1 ოქტომბრამდე შემოდგომის ან 1 მარტამდე გაზაფხულის სემესტრში. ბრძანება გამოცემიდან 2 სამუშაო დღის ვადაში აისახება რეესტრში, ხოლო 3 სამუშაო დღის ვადაში იგზავნება ცენტრში.
26. რეესტრის მონაცემების საფუძველზე, იმ დაწესებულების მიერ, საიდანაც გადმოდის სტუდენტი, გამოიცემა ბრძანება სხვა დაწესებულებაში ჩარიცხული პირის სტუდენტის სტატუსის შეწყვეტის შესახებ, ხოლო სტუდენტის მიმართვიდან 1 კვირის ვადაში გაიცემა ბრძანებიდან ამონაწერი, ასევე საგანმანათლებლო დოკუმენტი, რომლის საფუძველზეც იგი ამ დაწესებულებაში ჩაირიცხა, და სტუდენტის პირად საქმეში არსებული სხვა დოკუმენტაცია. გარდა ამისა, სტუდენტმა უნდა გაიაროს აკადემიური და ადმინისტრაციული რეგისტრაცია; მითითებულ ვადაში დასახელებული დოკუმენტაციის წარმოდგენლობა ან რეგისტრაციის გაუვლელი არის სტუ-ში ჩარიცხვის ბრძანების ძალადაკარგულად ცნობის საფუძველი.
27. სტუდენტის სტატუსის შეწყვეტის შესახებ ბრძანება და მასთან დაკავშირებული ინფორმაციის ელექტრონული ვერსია ცენტრის დირექტორის ინდივიდუალური ადმინისტრაციულ-სამართლებრივი აქტით დადგენილი ფორმის შესაბამისად ცენტრს წარედგინება 7 ოქტომბრამდე შემოდგომის ან 7 მარტამდე გაზაფხულის სემესტრში.
28. თუ სტუდენტი პირად საქმესთან ერთად წარმოადგენს დოკუმენტს, რომელშიც მოცემული იქნება ინფორმაცია მის მიერ ბოლო სასესიო პერიოდში სასწავლო კურსების ჩაბარების შესახებ, შეიძლება გაკეთდეს ახალი დასკვნა სწავლების წლის და დამატებით გასავლელი სასწავლო კურსების მითითებით.

## **მუხლი 5. შიდა მობილობა**

1. ბაკალავრიატის, მაგისტრატურის და დოქტორანტურის სტუდენტი (მათ შორის სტატუსშეჩერებული) უფლებამოსილია სტუ-ს ფარგლებში შეიცვალოს სპეციალობა.
2. შიდა მობილობა შესაძლებელია განხორციელდეს უმაღლესი განათლების ერთი საფეხურის ფარგლებში. დაუშვებელია შიდა მობილობა პროფესიული განათლების პროგრამიდან ბაკალავრიატის საგანმანათლებლო პროგრამაზე.
3. შიდა მობილობაში მონაწილეობის უფლება სწავლების პირველი წლის სტუდენტს, გარდა საქართველოს ტექნიკურ უნივერსიტეტსა და სან-დიეგოს სახელმწიფო უნივერსიტეტს შორის თანამშრომლობით განსახორციელებელ უმაღლეს საგანმანათლებლო პროგრამაზე გადამსვლელი სტუდენტისა, წარმოეშობა სწავლების ერთი სემესტრის შემდეგ. სწავლების პერიოდში არ შედის ის დრო, რომლის განმავლობაში პირს შეჩერებული ჰქონდა სტუდენტის სტატუსი.
4. შიდა მობილობა ხორციელდება სტუ-ს რექტორის ბრძანებით დადგენილ ვადაში. აკადემიური საბჭოს დადგენილებით შესაძლებელია შიდა მობილობა განხორციელდეს ინდივიდუალურად.
5. ფაკულტეტი ადგენს მის მიერ შეთავაზებულ საგანმანათლებლო პროგრამებთან შიდა მობილობის მსურველი პირის მიერ გავლილი საგანმანათლებლო პროგრამის ფარგლებში მიღწეული სწავლის შედეგების თავსებადობას და იღებს გადაწყვეტილებას შესაბამისი კრედიტების აღიარების შესახებ მე-4 მუხლის მე-14 – 21-ე პუნქტების ანალოგიურად.
6. შიდა მობილობით სტუდენტის გადაყვანა ფორმდება სტუ-ს რექტორის ბრძანებით. შიდა მობილობის პროცესის დასრულების შემდეგ სტუ ვალდებულია შიდა მობილობის შედეგები ორი კვირის ვადაში მიაწოდოს სსიპ განათლების ხარისხის განვითარების ეროვნულ ცენტრს.

## **მუხლი 6. გაცვლითი საგანმანათლებლო პროგრამა**

1. საქართველოს ტექნიკური უნივერსიტეტი ვალდებულია უცხო ქვეყნის უმაღლეს საგანმანათლებლო დაწესებულებასთან სტუდენტთა გაცვლის შესახებ ხელშეკრულების დადებამდე განათლების ხარისხის განვითარების ეროვნული ცენტრისგან მიიღოს წერილობითი ინფორმაცია აღნიშნული უმაღლესი საგანმანათლებლო დაწესებულების ამ ქვეყნის კანონმდებლობის შესაბამისად აღიარების შესახებ.
2. უცხო ქვეყნის კანონმდებლობის შესაბამისად აღიარებული უმაღლესი საგანმანათლებლო დაწესებულების გაცვლითი საგანმანათლებლო პროგრამის მონაწილე სტუდენტი, რომელსაც სტუდენტის სტატუსი მოპოვებული აქვს უცხო ქვეყანაში აღიარებულ უმაღლეს საგანმანათლებლო დაწესებულებაში, საქართველოს ტექნიკურ უნივერსიტეტში სწავლას აგრძელებს უმაღლესი განათლების შესაბამის საფეხურზე, სტუ-ს რექტორის მიერ გამოცემული აქტის საფუძველზე.
3. გაცვლითი საგანმანათლებლო პროგრამის მონაწილე საქართველოს ტექნიკური უნივერსიტეტის სტუდენტი უცხო ქვეყნის პარტნიორ უმაღლეს საგანმანათლებლო დაწესებულებაში სწავლას აგრძელებს ამ ქვეყნის კანონმდებლობით დადგენილი წესით.
4. დაუშვებელია გაცვლითი საგანმანათლებლო პროგრამის ფარგლებში საქართველოდან წასული გაცვლითი საგანმანათლებლო პროგრამის მონაწილე სტუდენტისათვის სტუდენტის სტატუსის შეჩერება, მის წასვლასთან და დაბრუნებასთან დაკავშირებით გამოიცემა სტუ-ს

რექტორის აქტები. საქართველოდან წასვლის პერიოდში სტუდენტს უნარჩუნდება სტუ-ს წინაშე არსებული ფინანსური ვალდებულება.

5. გაცვლითი საგანმანათლებლო პროგრამის ფარგლებში უცხო ქვეყნიდან ჩამოსული გაცვლითი საგანმანათლებლო პროგრამის მონაწილე სტუდენტი საქართველოს ტექნიკურ უნივერსიტეტს არ ეთვლება მისთვის დადგენილ სტუდენტთა საერთო რაოდენობაში. მის ჩამოსვლასთან და სწავლის დამთავრებასთან დაკავშირებით გამოიცემა სტუ-ს რექტორის აქტები.
6. იმ შემთხვევაში, თუ სტუ-სა და სხვა ქვეყნის დაწესებულებას შორის გაფორმებულია შეთანხმება გაცვლითი პროგრამის განხორციელების ან/და კრედიტების ურთიერთადიარების შესახებ, სტუ უფლებამოსილია, სსიპ განათლების ხარისხის განვითარების ეროვნული ცენტრისგან მიიღოს წინასწარი თანხმობა, რაც შემდგომში ამ გაცვლითი პროგრამის ფარგლებში უცხოეთში სწავლის პერიოდში მიღებული განათლების ავტომატურად აღიარების საფუძველია. ასეთ შემთხვევაში ამ გაცვლითი პროგრამის ფარგლებში უცხოეთში სწავლის პერიოდში მიღებული განათლება აღიარებულად ჩაითვლება.
7. ამ მუხლის მე-6 პუნქტით განსაზღვრული წინასწარი თანხმობის მისაღებად სტუ-მ ცენტრში უნდა წარადგინოს სტუ-სა და სხვა ქვეყნის საგანმანათლებლო დაწესებულებას შორის გაფორმებული შეთანხმება გაცვლითი პროგრამის განხორციელების ან/და კრედიტების ურთიერთადიარების შესახებ. წარდგენილ შეთანხმებაში მოცემული განათლების აღიარების წესი უნდა შეესაბამებოდეს უცხოეთში მიღებული განათლების აღიარების მარეგულირებელ კანონმდებლობას.
8. გაცვლითი პროგრამის ფარგლებში უცხოეთში სწავლის პერიოდში მიღებული განათლების აღიარების პროცედურები ხორციელდება მე-4 მუხლის მე-14 – 20-ე პუნქტების ანალოგიურად.

## **მუხლი 7. ერთობლივი საგანმანათლებლო პროგრამა**

1. ერთობლივი უმაღლესი საგანმანათლებლო პროგრამა არის საგანმანათლებლო პროგრამა, რომელიც ხორციელდება საქართველოს ტექნიკურ უნივერსიტეტსა და საქართველოს უმაღლეს საგანმანათლებლო დაწესებულებას/დაწესებულებებს ან/და უცხო ქვეყნის კანონმდებლობის შესაბამისად აღიარებულ უმაღლეს საგანმანათლებლო დაწესებულებას შორის, აგრეთვე საქართველოს ტექნიკურ უნივერსიტეტსა და დამოუკიდებელ სამეცნიერო-კვლევით ერთეულს/საჯარო სამართლის იურიდიულ პირთან – უნივერსიტეტთან არსებულ საჯარო სამართლის იურიდიულ პირს – სამეცნიერო-კვლევით დაწესებულებას/საჯარო სამართლის იურიდიულ პირს – სამეცნიერო-კვლევით დაწესებულებას შორის ერთობლივი უმაღლესი საგანმანათლებლო პროგრამის განხორციელების შესახებ შეთანხმების საფუძველზე და რომლის დასრულების შემდეგ უმაღლესი სტუ-ს წესდებით დადგენილი წესით და ერთობლივი უმაღლესი საგანმანათლებლო პროგრამის განხორციელების შესახებ შეთანხმების საფუძველზე გაიცემა უმაღლესი განათლების დამადასტურებელი დოკუმენტი/დოკუმენტები.
2. ერთობლივი უმაღლესი საგანმანათლებლო პროგრამის განსახორციელებლად სტუ-სა და მის განმახორციელებელ სხვა დაწესებულებას/დაწესებულებებს შორის ფორმდება ხელშეკრულება, რომლითაც განისაზღვრება ერთობლივი უმაღლესი საგანმანათლებლო პროგრამის შინაარსი

და განხორციელების ფორმები. ამ პუნქტით გათვალისწინებული ხელშეკრულების პროექტი უნდა შეთანხმდეს განათლების ხარისხის განვითარების ეროვნულ ცენტრთან.

3. ერთობლივი უმაღლესი საგანმანათლებლო პროგრამის დასრულების შემდეგ ერთობლივი აკადემიური ხარისხის მინიჭება ხორციელდება სტუ-სა და მისი განმახორციელებელი სხვა უმაღლესი საგანმანათლებლო დაწესებულების/დაწესებულებების მიერ, რაც განისაზღვრება შესაბამისი ხელშეკრულებით.
4. საქართველოს მოქალაქე ერთობლივ უმაღლეს საგანმანათლებლო პროგრამაზე ჩაირიცხება საქართველოს კანონმდებლობით დადგენილი წესით. სხვა პირი ერთობლივ უმაღლეს საგანმანათლებლო პროგრამაზე ჩაირიცხება შესაბამისი ქვეყნის კანონმდებლობით დადგენილი წესით, მისი განმახორციელებელი დაწესებულებების წინასწარი შეთანხმებით განსაზღვრულ ერთ-ერთ უმაღლეს საგანმანათლებლო დაწესებულებაში.
5. სტუდენტი, რომელიც ჩაირიცხულია საქართველოს რამდენიმე უმაღლესი საგანმანათლებლო დაწესებულების ერთობლივ უმაღლეს საგანმანათლებლო პროგრამაზე, თითოეულ უმაღლეს საგანმანათლებლო დაწესებულებას ეთვლება მისთვის დადგენილ სტუდენტთა საერთო რაოდენობაში.

#### **მუხლი 8. სტუდენტის სტატუსის შეჩერება**

1. სტუდენტის სტატუსის შეჩერებად განიხილება სტუ-სა და სტუდენტის უფლება-მოვალეობების შესრულებისგან გათავისუფლება სტუდენტის სტატუსის შეწყვეტის გარეშე.
2. სტუდენტის სტატუსის შეჩერების საფუძვლებია:
  - ა) ადმინისტრაციული (ფინანსური) ან აკადემიური (სასწავლო) რეგისტრაციის გაუვლელიობა;
  - ბ) ორსულობა, მშობიარობა, ბავშვის მოვლა ან ჯანმრთელობის მდგომარეობის გაუარესება;
  - გ) უცხო ქვეყანაში უმაღლეს საგანმანათლებლო დაწესებულებაში სწავლა, გარდა გაცვლითი საგანმანათლებლო პროგრამის ფარგლებში სწავლისა;
  - დ) პირადი განცხადება (მიზეზის მითითების გარეშე);
  - ე) სისხლის სამართლის პასუხისგებაში მიცემა, რაც გამორიცხავს სასწავლო პროცესში სტუდენტის მონაწილეობის შესაძლებლობას;
  - ვ) სამხედრო სავალდებულო ან სამხედრო სარეზერვო სამსახურში გაწვევა;
  - ზ) კანონმდებლობით გათვალისწინებული სხვა შემთხვევა.
3. სტუდენტის სტატუსის შეჩერების მაქსიმალური ვადაა 5 წელი.
4. სტატუსის შეჩერების შესახებ სტუდენტმა განცხადებით უნდა მიმართოს სტუ-ს რექტორს სასწავლო პროცესის დაწყებიდან არა უგვიანეს ექვსი კვირის განმავლობაში. აღნიშნული ვადის გასვლის შემდეგ, იგი კარგავს მის მიერ გადახდილი სწავლის საფასურის დაბრუნების ან მომდევნო სემესტრებში გამოყენების უფლებას.
5. სტუდენტი, რომლის დაწესებულება ლიკვიდირებულ იქნა უფლებამონაცვლის განსაზღვრის გარეშე, ამ ინსტრუქციის მე-4 მუხლის პირველ პუნქტში მითითებული ბრძანებით მიიჩნევა

სტუდენტის სტატუსშეჩერებულ პირად და მასზე ვრცელდება შესაბამისი წესით დადგენილი პირობები.

6. საგანმანათლებლო პროგრამის შეცვლის ან გაუქმების შემთხვევაში, სტუ აღნიშნული პროგრამის სტუდენტს დაეხმარება უნივერსიტეტის ფარგლებში სხვა პროგრამის შერჩევაში, ხოლო მის მიერ სხვა საგანმანათლებლო დაწესებულებაში გადასვლაზე სურვილის გამოთქმის შემთხვევაში – დაწესებულებისა და პროგრამის შერჩევაში.

## **მუხლი 9. სტუდენტის სტატუსის შეწყვეტა**

1. სტუდენტის სტატუსის შეწყვეტის საფუძვლებია:

ა) უნივერსიტეტში სწავლის პერიოდში 5 წელზე მეტი ხნის განმავლობაში სტუდენტის სტატუსის შეჩერება;

ბ) საგანმანათლებლო პროგრამის დასრულება მოცემულ საფეხურზე;

გ) პირადი განცხადება;

დ) შესაბამისი საგანმანათლებლო პროგრამის მოთხოვნების შეუსრულებლობა უნივერსიტეტის სასწავლო პროცესის მარეგულირებელი წესებით დადგენილ ვადებში;

ე) სტუდენტის მიმართ განხორციელებული დისციპლინური დევნის შედეგად მიღებული გადაწყვეტილება უნივერსიტეტის შინაგანაწესისა და ეთიკის კოდექსის ნორმების საფუძველზე;

ვ) გარდაცვალება;

ზ) კანონმდებლობით გათვალისწინებული სხვა შემთხვევა.

2. სტუდენტის სტატუსის შეწყვეტის შესახებ რექტორის ინდივიდუალური ადმინისტრაციული სამართლებრივი აქტის საფუძველს ამ მუხლის პირველი პუნქტის "ა", "ბ" და "დ" ქვეპუნქტებით გათვალისწინებულ შემთხვევებში წარმოადგენს დეკანის მოხსენებითი ბარათი, "გ", "ვ" და "ზ" ქვეპუნქტით გათვალისწინებულ შემთხვევებში – შესაბამისი დოკუმენტი და დეკანის მოხსენებითი ბარათი, ხოლო "ე" ქვეპუნქტით გათვალისწინებულ შემთხვევაში – ფაკულტეტის საბჭოს გადაწყვეტილება.

3. სტუდენტის სტატუსის შეწყვეტის შესახებ სამართლებრივი აქტით გათვალისწინებული სამართლებრივი შედეგები დგება მისი გამოცემიდან თორმეტი თვის შემდეგ. დროის ამ მონაკვეთში სტუდენტის სტატუსი ითვლება შეჩერებულად.

## **მუხლი 10. სტუდენტის სტატუსის აღდგენა**

1. თუ სტუდენტს შეუწყდა სტატუსი, მისი ხელახლა მოპოვება დასაშვებია კანონმდებლობით დადგენილი წესით.
2. სტუდენტის სტატუსშეწყვეტილი პირი სტატუსის შეწყვეტიდან თორმეტი თვის განმავლობაში ითვლება სტატუსშეჩერებულად და უფლება აქვს ისარგებლოს მობილობით, გარდა იმ შემთხვევისა, როდესაც სტუდენტის სტატუსის შეწყვეტის საფუძველი შეუთავსებელია მიმღები დაწესებულების წესდებასთან.
3. სტუდენტის სტატუსშეჩერებულ პირს მე-8 მუხლის მე-3 პუნქტში მითითებულ ვადაში უფლება აქვს, მორიგი სემესტრის დაწყებამდე არაუგვიანეს 2 კვირით ადრე, განცხადებით

მიმართოს რექტორს სტუდენტის სტატუსის აღდგენის თაობაზე (გარდა სტუ-ს სასწავლო პროცესის მართვის ინსტრუქციის მე-10 მუხლის მე-14 პუნქტით გათვალისწინებული შემთხვევისა); ასეთ პირს სტუდენტის სტატუსი შეიძლება აღუდგეს მორიგი სემესტრის დასაწყისიდან.

4. სტუდენტის სტატუსშიჩრებული პირი სტატუსის აღდგენისას, როგორც წესი, სწავლას აგრძელებს იმ სემესტრიდან, რომლიდანაც შეუჩრდა სტუდენტის სტატუსი; სასწავლო პროცესის უკეთ ორგანიზების მიზნით, სტატუსშიჩრებულმა პირმა, სტუდენტის სტატუსის აღდგენისას, სწავლა შეიძლება გააგრძელოს განსხვავებული სემესტრიდან, „სტუ-ში სასწავლო პროცესის მართვის ინსტრუქციით“ დადგენილი დამატებითი სემესტრების ჯამური რაოდენობის გათვალისწინებით.

### **მუხლი 11. სასწავლო პროცესში ინკლუზიური განათლების ინტეგრირებისა და ინკლუზიური სასწავლო გარემოს შექმნის მექანიზმები**

1. სტუ ახორციელებს ინკლუზიური განათლების დანერგვას, რაც გულისხმობს სპეციალური საგანმანათლებლო საჭიროების მქონე სტუდენტთა ჩართვას სასწავლო პროცესში და მათთვის შესაბამისი სასწავლო გარემოს შექმნის უზრუნველყოფას.
2. სპეციალური საგანმანათლებლო საჭიროების მქონე სტუდენტებისთვის სტუ-ის მიერ შემუშავდება ინდივიდუალური სასწავლო გეგმა, რომელიც დაეფუძნება საგანმანათლებლო პროგრამას და წარმოადგენს მის მოდიფიკაციას (მისაღწევი სწავლის შედეგების თვისობრივ ან რაოდენობრივ ცვლილებას) და/ან აკომოდაციას (სწავლებისა და შეფასების მიდგომებში ცვლილებას მისაღწევი სწავლის შედეგების ცვლილებების გარეშე) და, შესაბამისად, დააზუსტებს სპეციალური საგანმანათლებლო საჭიროების მქონე სტუდენტისთვის საჭირო დამატებით საგანმანათლებლო მომსახურებას.
3. ინდივიდუალური სასწავლო გეგმა გამოყენებული იქნება, როგორც სახელმძღვანელო სპეციალური საგანმანათლებლო საჭიროების მქონე სტუდენტის საგანმანათლებლო პროცესის განხორციელებისთვის. ინდივიდუალური სასწავლო გეგმის ფარგლებში სპეციალური საგანმანათლებლო საჭიროების მქონე სტუდენტის მიმდინარე შეფასება განხორციელდება ინდივიდუალურად, განსაზღვრულ მისაღწევ სწავლის შედეგებთან, ხოლო საბოლოო შეფასება და კრედიტების მინიჭება - საგანმანათლებლო პროგრამის/მოდულის მოთხოვნებთან მიმართებით.
4. სპეციალური საგანმანათლებლო საჭიროების მქონე სტუდენტთათვის სტუ უზრუნველყოფს სასწავლების ფიზიკური გარემოს ხელმისაწვდომობას შესაბამისი ინფრასტრუქტურის გამართვის გზით.

### **მუხლი 12. გარდამავალი დებულებები**

- 8.1 „უმაღლესი საგანმანათლებლო დაწესებულებიდან სხვა უმაღლეს საგანმანათლებლო დაწესებულებაში გადასვლის წესის დამტკიცების შესახებ“ საქართველოს განათლებისა და მეცნიერების მინისტრის 2010 წლის 4 თებერვლის №10/ნ ბრძანების ძალაში შესვლამდე გარიცხული/ამორიცხული სტუდენტი განიხილება სტუდენტის სტატუსშიჩრებულ პირად გარიცხვის/ამორიცხვის შესახებ ბრძანების გამოცემიდან ათი წლის განმავლობაში და ამ ვადაში უფლებამოსილია მიმართოს სტუ-ს სტუდენტის სტატუსის აღდგენის თაობაზე ან



ისარგებლოს მობილობის უფლებით, თუ გარიცხვის/ამორიცხვის საფუძველი არ არის აღნიშნული წესით დადგენილი სტუდენტის სტატუსის შეწყვეტის საფუძველი. პირი, რომელსაც გავლილი საგანმანათლებლო პროგრამის ნაწილი კანონმდებლობით დადგენილი წესით სახელმწიფოს მიერ აღიარებულად ეთვლება, ასევე განიხილება სტუდენტის სტატუსის შეჩერებულ პირად სახელმწიფოს მიერ აღიარებულ რეჟიმში სწავლის შეწყვეტიდან 10 წლის განმავლობაში.

*საქართველოს ტექნიკური უნივერსიტეტის სწავლების დეპარტამენტი*

*დამტკიცებულია აკადემიური საბჭოს მიერ 2019 წლის 13 თებერვალს,*

*დადგენილება №01-05-04/29*

**ერთიანი ეროვნული გამოცდების/საერთო სამაგისტრო გამოცდების გავლის გარეშე ჩარიცხვისათვის აბიტურიენტებს/მაგისტრანტობის კანდიდატებს/სტუდენტების მიერ განცხადებასთან ერთად წარმოსადგენი დოკუმენტები:**

1. ერთიანი ეროვნული გამოცდების გავლის გარეშე სწავლის გაგრძელების მსურველებმა განცხადებას უნდა დაურთონ შემდეგი დოკუმენტები:
  - ა) მოქალაქეობის დამადასტურებელი დოკუმენტის ასლი;
  - ბ) უცხო ქვეყანაში მიღებული სრული ზოგადი ან მისი ეკვივალენტური განათლების დამადასტურებელი დოკუმენტის ასლი;
  - გ) ამ ინსტრუქციის პირველი მუხლის მე-9 პუნქტის „ბ“ ქვეპუნქტით გათვალისწინებული საქართველოს მოქალაქეების განცხადებას ასევე უნდა დაერთოს სრული ზოგადი განათლების ბოლო 2 წლის განმავლობაში უცხო ქვეყანაში სწავლის დამადასტურებელი დოკუმენტი;
  - დ) ამ ინსტრუქციის პირველი მუხლის მე-9 პუნქტის „გ“ და „დ“ ქვეპუნქტებით გათვალისწინებულმა პირებმა ამ პუნქტის „ბ“ ქვეპუნქტით გათვალისწინებული დოკუმენტის ნაცვლად განცხადებას უნდა დაურთონ უცხო ქვეყნის უმაღლეს საგანმანათლებლო დაწესებულებაში მიღებული კრედიტების დამადასტურებელი დოკუმენტის ასლი ან უცხო ქვეყნის კანონმდებლობის შესაბამისად აღიარებული უმაღლესი საგანმანათლებლო დაწესებულების მიერ გაცემული კვალიფიკაციის დამადასტურებელი დოკუმენტი;
  - ე) ამ ინსტრუქციის პირველი მუხლის მე-9 პუნქტის „დ“ ქვეპუნქტით გათვალისწინებულმა საქართველოს მოქალაქეებმა ამ პუნქტის „ა“ და „დ“ ქვეპუნქტებით გათვალისწინებული დოკუმენტების გარდა განცხადებას უნდა დაურთონ უცხო ქვეყნის უმაღლეს საგანმანათლებლო დაწესებულებაში სწავლის პერიოდში უცხო ქვეყანაში ცხოვრების დამადასტურებელი დოკუმენტი (რეგისტრაციის ცნობა, ბინადრობის დამადასტურებელი ცნობა ან სხვა დოკუმენტი, რომელიც ადასტურებს საქართველოს მოქალაქის უცხო ქვეყანაში ცხოვრების ფაქტს. უცხო ქვეყანაში ცხოვრება გულისხმობს უცხო ქვეყანაში ყოფნას არანაკლებ 75 დღისა ერთ-ერთი სემესტრის განმავლობაში).
2. საერთო სამაგისტრო გამოცდების გარეშე სწავლის გაგრძელების მსურველებმა განცხადებას უნდა დაურთონ შემდეგი დოკუმენტები:
  - ა) მოქალაქეობის დამადასტურებელი დოკუმენტის ასლი;
  - ბ) უცხო ქვეყნის მიერ აღიარებული უმაღლესი საგანმანათლებლო დაწესებულების მიერ გაცემული უმაღლესი განათლების შესაბამისი კვალიფიკაციის დამადასტურებელი დოკუმენტის ასლი;
  - გ) ამ ინსტრუქციის პირველი მუხლის მე-10 პუნქტის „ბ“ და „გ“ ქვეპუნქტებით გათვალისწინებულმა პირებმა ამ პუნქტის „ბ“ ქვეპუნქტით გათვალისწინებული დოკუმენტის ნაცვლად განცხადებას უნდა დაურთონ უცხო ქვეყნის უმაღლეს საგანმანათლებლო დაწესებულების მაგისტრატურაში მიღებული კრედიტების დამადასტურებელი დოკუმენტის ასლი ან უცხო ქვეყნის კანონმდებლობის შესაბამისად აღიარებული უმაღლესი საგანმანათლებლო დაწესებულების მიერ გაცემული მაგისტრის ან მასთან გათანაბრებული აკადემიური ხარისხის დამადასტურებელი დოკუმენტი.
  - დ) ამ ინსტრუქციის პირველი მუხლის მე-10 პუნქტის „გ“ ქვეპუნქტით გათვალისწინებულმა საქართველოს მოქალაქეებმა ამ პუნქტის „ა“ და „გ“ ქვეპუნქტებით გათვალისწინებულ დოკუმენტაციის გარდა, განცხადებას ასევე უნდა დაურთონ უცხო ქვეყნის უმაღლეს საგანმანათლებლო დაწესებულებაში სწავლის პერიოდში უცხო ქვეყანაში ცხოვრების

დამადასტურებელი დოკუმენტი (რეგისტრაციის ცნობა, ბინადრობის დამადასტურებელი ცნობა ან სხვა დოკუმენტი, რომელიც ადასტურებს საქართველოს მოქალაქის უცხო ქვეყანაში ცხოვრების ფაქტს. უცხო ქვეყანაში ცხოვრება გულისხმობს უცხო ქვეყანაში ყოფნას არანაკლებ 75 დღისა ერთ-ერთი სემესტრის განმავლობაში).

- ე) ამ ინსტრუქციის პირველი მუხლის მე-10 პუნქტის „დ“ ქვეპუნქტით გათვალისწინებულმა მაგისტრანტობის კანდიდატებმა ამ პუნქტის „ა“ ქვეპუნქტით გათვალისწინებული დოკუმენტის გარდა უნდა წარმოადგინონ:
  - ე.ა) ამ ინსტრუქციის პირველი მუხლის მე-9 პუნქტით დადგენილი წესით ჩარიცხვის შედეგად მიღებული კვალიფიკაციის დამადასტურებელი დოკუმენტის – დიპლომისა და დიპლომის დანართის ასლები;
  - ე.ბ) უმაღლესი საგანმანათლებლო დაწესებულების ხელმძღვანელის აქტი, რომელიც ადასტურებს უმაღლეს საგანმანათლებლო დაწესებულებაში უმაღლესი განათლების პირველ საფეხურზე პირის ამ მუხლის პირველი პუნქტით დადგენილი წესით ჩარიცხვას.
  - ვ) ამ ინსტრუქციის პირველი მუხლის მე-10 პუნქტის „ე“ ქვეპუნქტით გათვალისწინებულმა მაგისტრანტობის კანდიდატებმა ამ პუნქტის „ა“ ქვეპუნქტით გათვალისწინებული დოკუმენტის გარდა უნდა წარმოადგინონ ამ ინსტრუქციის პირველი მუხლის მე-10 პუნქტის „ე“ ქვეპუნქტით დადგენილი წესით ჩარიცხვის შედეგად მიღებული კვალიფიკაციის დამადასტურებელი დოკუმენტის - დიპლომის ასლი.
- 3. მოქალაქეობის არმქონე პირის განცხადებას მოქალაქეობის დამადასტურებელი დოკუმენტის ნაცვლად უნდა დაერთოს ბინადრობის მოწმობის ასლი.
- 4. უცხო ენაზე შედგენილი დოკუმენტები უნდა იყოს თარგმნილი ქართულ ენაზე და დამოწმებული ნოტარიუსის მიერ.

**სტუდენტის დატვირთვის კრედიტებით გაანგარიშების წესი,  
როდესაც მის მიერ გავლილი საგანმანათლებლო პროგრამა არ არის შესრულებული ევროპული  
კრედიტების ტრანსფერის სისტემის შესაბამისად**

1. 1 UK კრედიტი შეესაბამება 0,5 ECTS კრედიტს;
2. საკონტაქტო საათებში მოცემული სასწავლო კურსის დატვირთვის შესაბამისობა დგინდება შემდეგნაირად:
  - 1-50 საათი შეესაბამება 3 კრედიტს;
  - 51-80 საათი შეესაბამება 4 კრედიტს;
  - 81-120 საათი შეესაბამება 5 კრედიტს;
  - 121-160 საათი შეესაბამება 6 კრედიტს.
3. სტუდენტის მიერ მიღებული შეფასებების შესაბამისობა დგინდება შემდეგნაირად:

შეფასების ადრე მოქმედი სისტემების ნიშნები/ქულები	ECTS-ის შეფასების ქულა	
ხუთბალიანი სისტემის ნიშნები	5 (ფრიადი)	91-100 (საშუალო - 96)
	4 (კარგი)	71-90 (საშუალო - 81)
	3 (დამაკმაყოფილებელი)	51-70 (საშუალო - 61)
	ჩათვლა	მიღებული დადებითი ნიშნების საშუალო არითმეტიკულის შესაბამისი ქულა
UK კრედიტების შესაბამისი შეფასებები (ქულები)	81-100 (ფრიადი)	91-100 (საშუალო - 96)
	61-80 (კარგი)	71-90 (საშუალო - 81)
	40-60 (დამაკმაყოფილებელი)	51-70 (საშუალო - 61)

4. საშუალო შეწონილი შეფასების (Grade Point Average – GPA) გამოსათვლელად თითოეული საგნის კრედიტების (საათების) რაოდენობა მრავლდება ამ საგანში მიღებული ქულების (ბალების) შესაბამის პირობით შეფასებაზე და ასეთი ნამრავლების ჯამი იყოფა კრედიტების (საათების) ჯამზე.
- 5.

ქულების (ბალების) შესაბამისი პირობითი შეფასებების სიდიდეები მოცემულია ცხრილებში:

ა) ECTS-ის ქულების საფუძველზე

ქულა	აღნიშვნა	შეფასება	შეფასების კლასიფიკაცია	პირობითი შეფასება GPA
91 - 100	A	ფრიადი	დადებითი	4,00
81 - 90	B	ძალიან კარგი	დადებითი	3,25
71 - 80	C	კარგი	დადებითი	2,50
61 - 70	D	დამაკმაყოფილებელი	დადებითი	1,75
51 - 60	E	საკმარისი	დადებითი	1,00
41 - 50	FX	ვერ ჩააბარა	უარყოფითი	0,00
0 - 40	F	ჩაიჭრა	უარყოფითი	

ბ) UK კრედიტების შესაბამისი ქულების საფუძველზე

ქულა	შეფასება	შეფასების კლასიფიკაცია	პირობითი შეფასება GPA
81 - 100	ფრიადი	დადებითი	4,0
61 - 80	კარგი	დადებითი	2,5
40 - 60	დამაკმაყოფილებელი	დადებითი	1,0
0 - 39	არადამაკმაყოფილებელი	უარყოფითი	0,0

ბ) 5-ბალიანი შეფასებების საფუძველზე

ბალი	შეფასება	შეფასების კლასიფიკაცია	პირობითი შეფასება GPA
5	ფრიადი	დადებითი	4,0
4	კარგი	დადებითი	2,5
3	დამაკმაყოფილებელი	დადებითი	1,0
2	არადამაკმაყოფილებელი	უარყოფითი	0,0

## პროექტები:

### მუხლი 2. საქართველოს ტექნიკურ უნივერსიტეტში სტუდენტთა კონტინგენტის დაგეგმვის წესი

1. სტუდენტთა კონტინგენტის დაგეგმვა რთული კომპლექსური ამოცანაა, რაც მოითხოვს მრავალი, ხშირად ერთმანეთზე დამოკიდებული ფაქტორების ანალიტიკურ გააზრებასა და ოპტიმალურ გადაწყვეტას.
2. უნივერსიტეტის სტუდენტთა კონტინგენტის დაგეგმვის მეთოდოლოგია და მისი გახორციელების მექანიზმი ითვალისწინებს უნივერსიტეტის მისიას, სტრატეგიული განვითარების გეგმას, რესურსებს, შრომის ბაზრის მოთხოვნებს, **უნივერსიტეტის მიერ შერჩეული ინდიკატორების ფაქტობრივ სიდიდეებს და მათ სამიზნე ნიშნულებს (იხ. დანართი 3)** და სხვ., რაც უზრუნველყოფს თითოეული სტუდენტისათვის ხარისხიანი განათლების მიღების შესაძლებლობას.
3. უნივერსიტეტის სტუდენტთა კონტინგენტი წარმოადგენს ყველა საგანმანათლებლო პროგრამის აქტიური სტატუსის მქონე სტუდენტების საერთო რაოდენობას. შესაბამისად, კონტინგენტის დაგეგმვა მჭიდროდაა დაკავშირებული საგანმანათლებლო პროგრამების დაგეგმვასთან და განვითარებასთან.
4. საგანმანათლებლო პროგრამის კონტინგენტის დაგეგმვა ხდება ფაკულტეტის მიერ, მენეჯერის, პროგრამის ხელმძღვანელისა და აკადემიური დეპარტამენტების ჩართულობით; იგი ეფუძნება უნივერსიტეტის მისიას, სტრატეგიული განვითარების გეგმას, შრომის ბაზრის (მასობრივი ინფორმაციის საშუალებებში გამოქვეყნებული ვაკანსიები, დამსაქმებელთა გამოკითხვის შედეგები და მათი წერილობითი დადასტურება სპეციალისტების მიმართ მიმდინარე და საპროგნოზო მოთხოვნებზე) კვლევის შედეგებისა და პროფესიული ასოციაციების, აგრეთვე სახელმწიფო, საერთაშორისო და არასამთავრობო ორგანიზაციების მიერ მოწოდებული ინფორმაციების ანალიზს. გათვალისწინებული უნდა იქნეს აგრეთვე სხვა საგანმანათლებლო დაწესებულებების მიერ იგივე კვალიფიკაციის სპეციალისტების მომზადება. მიღებული შედეგები ექვემდებარება დაზუსტებას უნივერსიტეტში/ფაკულტეტზე/აკადემიურ დეპარტამენტში/დეპარტამენტებში სათანადო აკადემიური/სამეცნიერო და მოწვეული პერსონალის, მატერიალური (შენობა-ნაგებობების, აუდიტორიების, ლაბორატორიების, კაბინეტების, პროგრამის განხორციელებისათვის აუცილებელი სხვა სათავსების მდგომარეობა და სათანადო ინვენტარით აღჭურვილობა, ელექტროენერგია და მასალებით უზრუნველყოფა, საერთო და სასწავლო ფართის სიდიდე და სხვ.), საბიბლიოთეკო, საინფორმაციო და ფინანსური რესურსების არსებობით, პრაქტიკის ობიექტებზე სტუდენტების გატარების შესაძლებლობით, აგრეთვე მოქმედ პროგრამებზე – კურსდამთავრებულთა დასაქმების (მათ შორის, მიღებული კვალიფიკაციით) სტატისტიკური მაჩვენებლებით.
5. იმ შემთხვევაში, თუ **უნივერსიტეტის** ~~ჯამური დაგეგმილი~~ **კონტინგენტი** **კონტინგენტის დაგეგმვისას მისი საანგარიშო სიდიდე გადააჭარბებს**

**უნივერსიტეტისათვის** უმაღლესი საგანმანათლებლო დაწესებულებების ავტორიზაციის საბჭოს (შემდგომში ავტორიზაციის საბჭო) მიერ განსაზღვრულ სტუდენტთა ადგილების ზღვრულ რაოდენობას, **უნივერსიტეტს შეუძლია** კანონმდებლობით დადგენილი წესით **მიმართოს** სსიპ განათლების ხარისხის განვითარების ცენტრს სტუდენტთა ადგილების ზღვრული რაოდენობის გაზრდის თაობაზე.

6. სტუდენტთა კონტინენტის შევსების/განახლების დაგეგმვა მოიცავს მომავალი სასწავლო წლის/სემესტრისთვის ერთიანი ეროვნული/საერთო სამაგისტრო გამოცდების ან მათ გარეშე, მობილობის ან სხვა, სწავლების საფეხურის (ბაკალავრიატი, მაგისტრატურა, დოქტორანტურა, ქართულ ენაში მომზადების საგანმანათლებლო პროგრამა) შესაბამისი, კანონმდებლობით დადგენილი წესით ჩარიცხვისათვის მისაღები ადგილების დადგენას, რისთვისაც სწავლების დეპარტამენტი წინასწარ მიმართავს ფაკულტეტებს შესაბამისი ინფორმაციის წარმოდგენის თაობაზე.
7. მისაღებ სტუდენტთა რაოდენობის განსაზღვრისას ფაკულტეტები, გარდა **მე-4** პუნქტში დასახელებული ფაქტორებისა, ითვალისწინებენ აქტიური სტატუსის მქონე სტუდენტების რაოდენობას, მათ შორის დამამთავრებელი სტუდენტების რაოდენობას და სხვა ფაქტორებს, მათ შორის გაანალიზდება ბოლო სამი წლის სტატისტიკური ინფორმაცია:
  - გამოცხადებული საკონკურსო ადგილების რაოდენობა;
  - რეგისტრირებული (უპირატესად პირველი არჩევანით) აბიტურიენტების რაოდენობა;
  - ჩარიცხული სტუდენტების რაოდენობა;
  - სტატუსშეჩერებული სტუდენტების რაოდენობა;
  - სტატუსშეწყვეტილი სტუდენტების რაოდენობა;
  - სტატუსადგენილი სტუდენტების რაოდენობა;
  - ერთიანი ეროვნული გამოცდების/საერთო სამაგისტრო გამოცდების გავლის გარეშე ჩარიცხული სტუდენტების რაოდენობა;
  - მობილობით (მათ შორის, შიდა მობილობით) გადასული სტუდენტების რაოდენობა;
  - მობილობით (მათ შორის, შიდა მობილობით) გადმოსული სტუდენტების რაოდენობა;
  - შრომის ბაზრის მოთხოვნები;
  - დასაქმებული (მათ შორის, მიღებული კვალიფიკაციით) კურსდამთავრებულების რაოდენობა;
  - ერთიანი ეროვნული გამოცდების/საერთო სამაგისტრო გამოცდების გავლის გარეშე ჩარიცხული სტუდენტების რაოდენობა.

8. გასათვალისწინებელია ის, რომ გაცვლითი საგანმანათლებლო პროგრამის ფარგლებში საქართველოდან წასული გაცვლითი საგანმანათლებლო პროგრამის მონაწილე სტუდენტი რჩება სტუ-ს აქტიური სტატუსის მქონედ, ხოლო გაცვლითი საგანმანათლებლო პროგრამის ფარგლებში უცხო ქვეყნიდან ჩამოსული გაცვლითი საგანმანათლებლო პროგრამის მონაწილე სტუდენტი საქართველოს ტექნიკურ უნივერსიტეტს არ ეთვლება მისთვის დადგენილ სტუდენტთა საერთო რაოდენობაში.
9. ერთობლივ უმაღლეს საგანმანათლებლო პროგრამაზე მისაღები კონტინგენტის განსაზღვრისას გასათვალისწინებელია ის, რომ სტუდენტი, რომელიც ჩარიცხულია საქართველოს რამდენიმე უმაღლესი საგანმანათლებლო დაწესებულების ერთობლივ უმაღლეს საგანმანათლებლო პროგრამაზე, თითოეულ უმაღლეს საგანმანათლებლო დაწესებულებას ეთვლება მისთვის დადგენილ სტუდენტთა საერთო რაოდენობაში.
10. საქართველოს ტექნიკური უნივერსიტეტი, რომელიც ახორციელებს ერთიანი ეროვნული გამოცდების მხოლოდ ზოგადი უნარების აზერბაიჯანულენოვანი, სომხურენოვანი, აფხაზურენოვანი და ოსურენოვანი ტესტების შედეგების საფუძველზე სტუდენტების მიღებას ქართულ ენაში მომზადების საგანმანათლებლო პროგრამაზე, ვალდებულია, ავტორიზაციის საბჭოს მიერ სტუ-ისთვის განსაზღვრული სტუდენტების რაოდენობის ფარგლებში, აღნიშნულ პროგრამაზე სტუდენტების ჩარიცხვისათვის, გამოაცხადოს „უმაღლესი განათლების შესახებ“ საქართველოს კანონის თანახმად დადგენილი რაოდენობის ადგილები.
11. თითოეული პროგრამისათვის შედგენილი ანკეტა-კითხვარის მონაცემები განიხილება შესაბამისი აკადემიური დეპარტამენტის/დეპარტემენტების სხდომაზე, მტკიცდება ფაკულტეტის/სკოლის საბჭოს სხდომაზე და საბჭოს დადგენილებასა და მოხსენებით ბარათთან ერთად წარედგინება სწავლების დეპარტამენტს.
12. სწავლების დეპარტამენტი უზრუნველყოფს სწავლების ყველა საფეხურზე (ბაკალავრიატი, მაგისტრატურა, დოქტორანტურა, ქართულ ენაში მომზადების საგანმანათლებლო პროგრამა) მისაღებად ფაკულტეტებიდან წარმოდგენილი მოთხოვნების გაერთიანებას, განხილვას/გაანალიზებას და წარდგენას აკადემიურ საბჭოზე დასამტკიცებლად.
13. აკადემიური საბჭო ითვალისწინებს უნივერსიტეტის მისიას, მოცემულ ეტაპზე საქმიანობის პრიორიტეტებს, ავტორიზაციის საბჭოს მიერ განსაზღვრული სტუდენტთა ადგილების ზღვრულ რაოდენობას, აგრეთვე სხვა ფაქტორებს.
14. სწავლების დეპარტამენტი უზრუნველყოფს დადგენილ ვადებში სსიპ - განათლების ხარისხის ეროვნულ ცენტრსა და სსიპ - შეფასებისა და გამოცდების ეროვნულ ცენტრში წარსადგენად შესაბამისი დოკუმენტაციის მომზადებას.

#### მუხლი 4. სტუდენტთა მობილობა



1. სტუ-ში მობილობის წესით ჩარიცხვა ხორციელდება „უმაღლესი საგანმანათლებლო დაწესებულებიდან სხვა უმაღლეს საგანმანათლებლო დაწესებულებაში გადასვლის წესის დამტკიცების შესახებ“ საქართველოს განათლებისა და მეცნიერების მინისტრის 2010 წლის 4 თებერვლის №10/ნ ბრძანების და ამ ინსტრუქციის შესაბამისად.
2. სტუდენტთა უმაღლესი საგანმანათლებლო დაწესებულებიდან (შემდგომში – დაწესებულება) სხვა დაწესებულებაში გადასვლის (შემდგომში – მობილობა) პროცესის ადმინისტრირებას ახორციელებს საჯარო სამართლის იურიდიული პირი – განათლების მართვის საინფორმაციო სისტემა (შემდგომში – მართვის სისტემა).
3. მობილობის უფლება აქვს პირს, რომლის დაწესებულებაში ჩარიცხვა განხორციელდა კანონმდებლობით დადგენილი წესით და ელექტრონულ პორტალზე მობილობის მსურველად რეგისტრაციის მომენტისათვის არის დაწესებულების სტუდენტი.
4. მობილობის უფლება ასევე აქვს ამ მუხლის მე-3 პუნქტით გათვალისწინებულ პირს, რომელსაც ელექტრონულ პორტალზე რეგისტრაციის მომენტისათვის შეჩერებული აქვს დაწესებულების სტუდენტის სტატუსი, ასევე პირს, რომელმაც წარმატებით დაძლია ერთიანი ეროვნული გამოცდები და რომელიც სსიპ – შეფასებისა და გამოცდების ეროვნული ცენტრის მიერ დამტკიცებულ რანჟირების დოკუმენტში მითითებულ დაწესებულებას ჩარიცხვის მიზნით ვერ მიმართავს, ვინაიდან დაწესებულება ლიკვიდირებულ იქნა უფლებამონაცვლის განსაზღვრის გარეშე, დაწესებულებამ დაკარგა ავტორიზაცია, დაწესებულებას შეეზღუდა სტუდენტთა მიღების უფლება ან საგანმანათლებლო პროგრამა აღარ ხორციელდება.
5. მობილობა შესაძლებელია განხორციელდეს უმაღლესი განათლების ერთი საფეხურის ფარგლებში. ამ პუნქტის მიზნებისათვის დიპლომირებული მედიკოსის/სტომატოლოგის/ვეტერინარის საგანმანათლებლო პროგრამები განიხილება აკადემიური უმაღლესი განათლების პირველი საფეხურის საგანმანათლებლო პროგრამასთან თავსებადად. დაუშვებელია მობილობა პროფესიული განათლების პროგრამიდან ბაკალავრიატის საგანმანათლებლო პროგრამაზე.
6. მობილობის უფლება სტუდენტს წარმოეშობა უმაღლესი განათლების შესაბამის საფეხურზე სწავლების ერთი წლის შემდეგ. სწავლების პერიოდში არ შედის ის დრო, რომლის განმავლობაშიც პირს შეჩერებული ჰქონდა სტუდენტის სტატუსი, გარდა იმ შემთხვევებისა, როდესაც დაწესებულება ლიკვიდირებულ იქნა უფლებამონაცვლის განსაზღვრის გარეშე, დაწესებულებამ დაკარგა ავტორიზაცია, ან დაწესებულების საგანმანათლებლო პროგრამა აღარ ხორციელდება.
7. სტუდენტის მობილობა შესაძლებელია განხორციელდეს კალენდარული წლის განმავლობაში ორჯერ, მართვის სისტემის მიერ დადგენილ ვადაში.
8. სტუ უფლებამოსილია, აკადემიური საბჭოს მიერ მიღებული დადგენილების საფუძველზე, მართვის სისტემის მიერ დადგენილ ვადაში ელექტრონულ პორტალზე დაარეგისტრიროს მობილობის ადგილები სწავლების საფეხურების, ფაკულტეტების და საგანმანათლებლო პროგრამების მიხედვით.
9. მობილობის მსურველის სტატუსს სტუდენტი მოიპოვებს ელექტრონულ პორტალზე რეგისტრაციის შედეგად.
10. სტუდენტი უფლებამოსილია აირჩიოს არა უმეტეს 5 საგანმანათლებლო პროგრამისა. რამდენიმე საგანმანათლებლო პროგრამაზე რეგისტრაციისას, იგი ვალდებულია განსაზღვროს მათი პრიორიტეტულობა.

11. მობილობის უფლება მაგისტრანტს წარმოეშობა მხოლოდ იმ საგანმანათლებლო პროგრამულ მიმართულებაზე, რომელსაც შეესაბამება მის მიერ ჩაბარებული საერთო სამაგისტრო გამოცდის ტესტის ტიპი.
12. სადოქტორო საგანმანათლებლო პროგრამებზე მობილობის უფლების მოპოვება ხორციელდება სტუ-ს დოქტორანტურის დებულების შესაბამისად.
13. მობილობის მსურველი მოიპოვებს შესაბამისი დაწესებულების საგანმანათლებლო პროგრამაზე ჩარიცხვის უფლებას მის მიერ ელექტრონულ პორტალზე რეგისტრირებული პრიორიტეტების მიხედვით, მართვის სისტემის მიერ დადგენილი წესით.
14. პირი, რომელმაც გამოთქვა სურვილი დაწესებულების საგანმანათლებლო პროგრამაზე ჩარიცხვის თაობაზე, ვალდებულია შეამოწმოს ელექტრონულ პორტალზე მობილობის შედეგი და დადებითი პასუხის შემთხვევაში, უფლებამოსილია, განცხადებით მიმართოს მიმღებ დაწესებულებას ჩარიცხვის თაობაზე. მობილობის მსურველთა ერთიანი სია, რომელმაც მოიპოვეს შესაბამის საგანმანათლებლო პროგრამაზე ჩარიცხვის უფლება, ქვეყნდება ცენტრის ელექტრონულ პორტალზე, რის შემდეგაც მობილობის მსურველი უფლებამოსილია, განცხადებით მიმართოს სტუ-ს ჩარიცხვის თაობაზე. განცხადებას თან უნდა ერთვოდეს საგანმანათლებლო დოკუმენტის ასლი, რომლის საფუძველზეც პირი ჩაირიცხა დაწესებულებაში და სტუდენტის პირად საქმეში არსებული სხვა დოკუმენტაციის ასლები.
15. მობილობის მსურველი, რომელიც სტუ-ს მიერ დადგენილ ვადაში არ მიმართავს განცხადებით სტუ-ს ჩარიცხვის თაობაზე, კარგავს აღნიშნულ საგანმანათლებლო პროგრამაზე ჩარიცხვის უფლებას, გარდა კანონმდებლობით გათვალისწინებული შემთხვევებისა.
16. სტუ ადგენს მის მიერ შეთავაზებულ საგანმანათლებლო პროგრამებთან მობილობის მსურველი პირის მიერ სხვა საგანმანათლებლო პროგრამის ფარგლებში მიღწეული სწავლის შედეგების თავსებადობას და იღებს გადაწყვეტილებას შესაბამისი კრედიტების აღიარების შესახებ.
17. აღიარებას ექვემდებარება დაწესებულების იმ პროგრამის ფარგლებში მიღებული კრედიტები, რომელზე ჩარიცხვა და სწავლება განხორციელდა კანონმდებლობით დადგენილი წესით.
18. შინაარსობრივი შესწავლის შედეგად შესაძლებელია დადგინდეს სტუდენტის მიერ გავლილი და სტუ-ს საგანმანათლებლო პროგრამით გათვალისწინებული სასწავლო კურსების შესაბამისობა, მათ სახელწოდებებში არსებული სხვაობის მიუხედავად. დასაშვებია იმ სასწავლო კურსის აღიარება, რომელიც არ არის გათვალისწინებული სტუ-ს საგანმანათლებლო პროგრამით.
19. სტუ უფლებამოსილია, კანონმდებლობით დადგენილი წესით გაიანგარიშოს სტუდენტის დატვირთვა კრედიტებით იმ საგანმანათლებლო პროგრამის შემთხვევაში, რომელიც არ არის შესრულებული ევროპული კრედიტების ტრანსფერის სისტემის შესაბამისად. სტუ უფლებამოსილია აგრეთვე დაადგინოს სტუდენტის მიერ მიღებული შეფასებების შესაბამისობა შეფასების სხვა სისტემასთან (იხ. დანართი 2).
20. თუ სტუდენტის მიერ გავლილი საგანმანათლებლო პროგრამის შეფასების სისტემა განსხვავდება მე-2 დანართში მოყვანილი სისტემებისაგან, სტუ უფლებამოსილია მობილობით გადმომსვლელი სტუდენტისაგან მოითხოვოს გამომშვები დაწესებულებიდან დამატებითი ინფორმაციის წარმოდგენა.

21. უმაღლესი საგანმანათლებლო პროგრამის კრედიტები, რომელთა საფუძველზეც განხორციელდა კვალიფიკაციის მინიჭება, არ შეიძლება აღიარებულ იქნეს სხვა საგანმანათლებლო პროგრამის მიზნებისათვის, გარდა დიპლომირებული სპეციალისტის საგანმანათლებლო პროგრამის ფარგლებში მიღებული კრედიტების ბაკალავრიატის საგანმანათლებლო პროგრამის მიზნებისთვის აღიარებისა.

22. სტუ უფლებამოსილია, გასაუბრების ან გამოცდის საფუძველზე დაადგინოს მობილობის მსურველის ცოდნისა და უნარების საგანმანათლებლო პროგრამასთან თავსებადობა. ამ თავსებადობის არარსებობა პირის მობილობით ჩარიცხვაზე უარის თქმის საფუძველია.

დაწესებულება უფლებამოსილია საბაკალავრო, სამაგისტრო და სადოქტორო საგანმანათლებლო პროგრამებზე ჩარიცხვისათვის განსაზღვროს წინაპირობები, რაც გულისხმობს მობილობის მსურველის ცოდნისა და უნარების საგანმანათლებლო პროგრამასთან თავსებადობის დადგენას. ამ თავსებადობის არარსებობა პირის მობილობით ჩარიცხვაზე უარის თქმის საფუძველია.

23. აღიარება ფორმდება მიმღებ ფაკულტეტზე შექმნილი კომისიის გადაწყვეტილებით (დასკვნით). კომისია იქმნება ფაკულტეტზე დეკანის, ხარისხის უზრუნველყოფის სამსახურის უფროსის და აკადემიური დეპარტამენტის უფროსის შემადგენლობით; კომისიის გადაწყვეტილებას ამოწმებს სწავლების დეპარტამენტის უფროსი და ამტკიცებს სტუ-ს ვიცე-რექტორი. დასკვნაში მიეთითება სტუდენტის მიერ გავლილი საგანმანათლებლო პროგრამის შესაბამისობა სტუ-ს პროგრამასთან, აღიარებული კრედიტების რაოდენობა, სწავლების წელი/სემესტრი, რომლიდანაც უნდა გააგრძელოს სტუდენტმა სწავლა. აღნიშნული წელი/სემესტრი დგინდება აღიარებული კრედიტების რაოდენობისა და გასავლელი საგნების წინაპირობების გათვალისწინებით. დასკვნაში განისაზღვრება აგრეთვე წინა სემესტრების არაღიარებული საგნების გავლის რეკომენდებული სემესტრები. სტუდენტი უფლებამოსილია გაეცნოს დასკვნის პროექტს და მონაწილეობა მიიღოს მის კორექტირებაში. დასკვნის ეს ნაწილი წარმოადგენს სტუდენტთან სასწავლო და საფინანსო ხელშეკრულებების გაფორმების საფუძველს. სტუდენტის სწავლის საფასური განისაზღვრება რეალურად გასავლელი საგნების შესაბამისი კრედიტების რაოდენობის მიხედვით. საჭიროების შემთხვევაში სტუდენტი შეიძლება გადაყვანილი იქნეს ინდივიდუალურ საგანმანათლებლო პროგრამაზე.

24. სტუ, ამ ინსტრუქციით გათვალისწინებული პირობებისა და მობილობის მსურველი სტუდენტის თანხმობის საფუძველზე, შეიმუშავებს სამართლებრივი აქტის პროექტს სტუდენტის მობილობით ჩარიცხვის თაობაზე.

25. სტუ სსიპ – განათლების ხარისხის განვითარების ეროვნული ცენტრს წარუდგენს სტუდენტის ჩარიცხვის სამართლებრივი აქტის პროექტს, რომლის საფუძველზეც ცენტრი, სათანადო შემოწმების საფუძველზე, გასცემს დასკვნას პროექტში მითითებული სტუდენტების მობილობით ჩარიცხვის შესაძლებლობის შესახებ.

26. სტუ რეესტრში ასახავს სტუდენტის ჩარიცხვის სამართლებრივი აქტის პროექტს და მასთან დაკავშირებულ ინფორმაციას მართვის სისტემის უფროსის ინდივიდუალური ადმინისტრაციულ-სამართლებრივი აქტით დადგენილი ფორმის შესაბამისად, რის შემდეგაც მართვის სისტემა ამოწმებს დაწესებულების ბრძანების პროექტში ასახული სტუდენტის მონაცემების შესაბამისობას ამ წესის მოთხოვნებთან, რეესტრისა და ელექტრონული პორტალის მონაცემებთან და გასცემს ელექტრონულ დასკვნას პროექტში მითითებული

სტუდენტების მობილობით ჩარიცხვის შესაძლებლობის შესახებ. მართვის სისტემა უფლებამოსილია გამოითხოვოს დამატებითი ინფორმაცია.

27. ბრძანების პროექტზე მართვის სისტემის დადებითი დასკვნის მიღების შემდეგ, გამოიცემა სტუ-ს ბრძანება სტუდენტის მობილობით ჩარიცხვის შესახებ.
28. სწავლების დეპარტამენტის მიერ მომზადებული სტუ-ს ბრძანება სტუდენტის მობილობით ჩარიცხვის შესახებ გამოიცემა 1 ოქტომბრამდე შემოდგომის ან 1 მარტამდე გაზაფხულის სემესტრში. ბრძანება გამოცემიდან 2 სამუშაო დღის ვადაში აისახება რეესტრში, ხოლო 3 სამუშაო დღის ვადაში იგზავნება მართვის სისტემაში.
29. რეესტრის მონაცემების საფუძველზე, იმ დაწესებულების მიერ, საიდანაც გადმოდის სტუდენტი, გამოიცემა ბრძანება სტუ-ში ში მობილობით ჩარიცხული პირის სტუდენტის სტატუსის შეწყვეტის შესახებ, ხოლო სტუდენტის მიმართვიდან 1 კვირის ვადაში გაიცემა ბრძანებიდან ამონაწერი, ასევე საგანმანათლებლო დოკუმენტი, რომლის საფუძველზეც იგი ამ დაწესებულებაში ჩაირიცხა, და სტუდენტის პირად საქმეში არსებული სხვა დოკუმენტაცია. შესაბამის პროცედურებს ახორციელებს სტუ სხვა დაწესებულებაში გადამსვლელი სტუდენტების მიმართ.
30. მობილობით ჩარიცხულმა სტუდენტმა უნდა გაიაროს აკადემიური და ადმინისტრაციული რეგისტრაცია; დადგენილ ვადაში დასახელებული დოკუმენტაციის წარმოდგენლობა ან რეგისტრაციის გაუვლელი არის სტუ-ში ჩარიცხვის ბრძანების ძალადაკარგულად ცნობის საფუძველი.
31. სტუდენტის სტატუსის შეწყვეტის შესახებ ბრძანება და მასთან დაკავშირებული ინფორმაციის ელექტრონული ვერსია მართვის სისტემის უფროსის ინდივიდუალური ადმინისტრაციულ-სამართლებრივი აქტით დადგენილი ფორმის შესაბამისად, მართვის სისტემას წარედგინება 7 ოქტომბრამდე შემოდგომის ან 7 მარტამდე გაზაფხულის სემესტრში.
32. თუ სტუდენტი პირად საქმესთან ერთად წარმოადგენს დოკუმენტს, რომელშიც მოცემული იქნება ინფორმაცია მის მიერ ბოლო სასესიო პერიოდში სასწავლო კურსების ჩაბარების შესახებ, შეიძლება გაკეთდეს ახალი დასკვნა სწავლების წლის და დამატებით გასავლელი სასწავლო კურსების მითითებით.
33. რიგგარეშე მობილობა ხორციელდება ამ მუხლის პირველ პუნქტში მითითებული ბრძანების თანახმად.

## მუხლი 5. შიდა მობილობა

7. ბაკალავრიატის, მაგისტრატურის და დოქტორანტურის სტუდენტი (მათ შორის სტატუსშეჩერებული) უფლებამოსილია სტუ-ს ფარგლებში შეიცვალოს სპეციალობა.
8. შიდა მობილობა შესაძლებელია განხორციელდეს უმაღლესი განათლების ერთი საფეხურის ფარგლებში. დაუშვებელია შიდა მობილობა პროფესიული განათლების პროგრამიდან ბაკალავრიატის საგანმანათლებლო პროგრამაზე.

9. შიდა მობილობაში მონაწილეობის უფლება სწავლების პირველი წლის სტუდენტს, გარდა საქართველოს ტექნიკურ უნივერსიტეტსა და სან-დიეგოს სახელმწიფო უნივერსიტეტს შორის თანამშრომლობით განსახორციელებელ უმაღლეს საგანმანათლებლო პროგრამზე გადამსვლელი სტუდენტისა, წარმოეშობა სწავლების ერთი სემესტრის შემდეგ. სწავლების პერიოდში არ შედის ის დრო, რომლის განმავლობაში პირს შეჩერებული ჰქონდა სტუდენტის სტატუსი.
10. შიდა მობილობის უფლება მაგისტრანტს წარმოეშობა მხოლოდ იმ საგანმანათლებლო პროგრამულ მიმართულებაზე, რომელსაც შეესაბამება მის მიერ ჩაბარებული საერთო სამაგისტრო გამოცდის ტესტის ტიპი.
11. სადოქტორო საგანმანათლებლო პროგრამებზე შიდა მობილობის უფლების მოპოვება ხორციელდება სტუ-ს დოქტორანტურის დებულების შესაბამისად.
12. შიდა მობილობა ხორციელდება სტუ-ს რექტორის ბრძანებით დადგენილ ვადაში. აკადემიური საბჭოს დადგენილებით შესაძლებელია შიდა მობილობა განხორციელდეს ინდივიდუალურად.
13. სტუ უფლებამოსილია გამოაცხადოს რიგგარეშე შიდა მობილობა, მის მიერ დადგენილი წესით, ამ დაწესებულების საგანმანათლებლო პროგრამის აკრედიტაციაზე უარის თქმის ან აკრედიტაციის გაუქმების შემთხვევაში ან დაწესებულების მიერ საგანმანათლებლო პროგრამის გაუქმების შემთხვევაში.
14. ფაკულტეტი ადგენს მის მიერ შეთავაზებულ საგანმანათლებლო პროგრამებთან შიდა მობილობის მსურველი პირის მიერ გავლილი საგანმანათლებლო პროგრამის ფარგლებში მიღწეული სწავლის შედეგების თავსებადობას და იღებს გადაწყვეტილებას შესაბამისი კრედიტების აღიარების შესახებ მე-4 მუხლის მე-14 – 21-ე პუნქტების ანალოგიურად.
15. შიდა მობილობით სტუდენტის გადაყვანა ფორმდება სტუ-ს რექტორის ბრძანებით. შიდა მობილობის პროცესის დასრულების შემდეგ სტუ ვალდებულია შიდა მობილობის შედეგები ორი კვირის ვადაში მიაწოდოს მართვის სისტემას.

შიდა მობილობა ცხადდება წელიწადში ორჯერ დაწესებულების მიერ დადგენილი წესის გათვალისწინებით. შიდა მობილობის პროცესის დასრულების შემდეგ უმაღლესი საგანმანათლებლო დაწესებულება ვალდებულია შიდა მობილობის შედეგები ორი კვირის ვადაში მიაწოდოს მართვის სისტემას.

<ul style="list-style-type: none"> <li>• დაწესებულების საკუთრებაში ან მართლზომიერ მფლობელობაში არსებული მატერიალური რესურსი (უძრავი და მოძრავი ნივთები) ემსახურება დაწესებულების საგანმანათლებლო მიზნების რეალიზაციას და შეესაბამება საგანმანათლებლო პროგრამების, კვლევითი/შემოქმედებითი/სამეცნიერო საკმიანობის განხორციელების მოთხოვნებს და არსებულ და/ან დაგეგმილ სტუდენტთა რაოდენობას;</li> <li>• უსდ-ს აქვს: შენობაში შემდეგი სავალდებულო ფართები: ფოიე, სარეკრეაციო სივრცეები, თეორიული სწავლების აუდიტორია/აუდიტორიები, ადმინისტრაციული სათავსო/სათავსოები, სივრცე ჯგუფური მუშაობისთვის, სანიტარიული კვანძები, ბიბლიოთეკა, დარგობრივი სპეციფიკის შესაბამისი ლაბორატორია/ები, სასწავლო კაბინეტები, არქივი. სათავსოების განლაგება უზრუნველყოფს საგანმანათლებლო და ადმინისტრაციული პროცესის ეფექტურ წარმართვას;</li> <li>• უძრავ ნივთებთან დაკავშირებით მართლზომიერი მფლობელობა წარმოიშობა წერილობითი ფორმით დადებული გარიგებისა და უფლების საჯარო რეესტრში რეგისტრაციის გზით. მართლზომიერი მფლობელობა უძრავ ნივთზე დასტურდება საჯარო რეესტრის ამონაწერით;</li> <li>• დაწესებულებაში შენობის აზომვითი ნახაზის საფუძველზე უნდა გაიმიჯნოს სასწავლო და დამხმარე ფართი. სასწავლო ფართში ითვლება ის ფართი, რომელიც გამოიყენება სწავლა-სწავლების მიზნებისთვის, კერძოდ: სასწავლო აუდიტორია, საკონფერენციო დარბაზი, საპროფესორო, სადაც სტუდენტებს პროფესორები უწევენ კონსულტაციას, სასწავლო/სამეცნიერო-კვლევითი ლაბორატორიები, ბიბლიოთეკა (გარდა წიგნსაცავისა) და სხვა ფართი საგანმანათლებლო პროგრამის სპეციფიკიდან გამომდინარე;</li> <li>• საგანმანათლებლო პროგრამების სპეციფიკის გათვალისწინებით არსებობს სათანადო ინვენტარით აღჭურვილი სასწავლო ფართი, მათ შორის სასწავლო/სამეცნიერო-კვლევითი ლაბორატორიები, პრაქტიკული კომპონენტის განსახორციელებლად საჭირო ინვენტარი, საინფორმაციო-ტექნოლოგიური აღჭურვილობა ან შესაბამის დაწესებულებებთან გაფორმებული ხელშეკრულებები ამ დაწესებულების რესურსების სათანადო გამოყენების პირობით, შესაბამისი მარაგები (რეაქტივები, სასწავლო მასალები და სხვა), რომლებიც უზრუნველყოფს საგანმანათლებლო პროგრამის მიზნებისა და სწავლის შედეგების მიღწევას;</li> <li>• მოძრავ ნივთებზე მართლზომიერი მფლობელობის მოსაპოვებლად აუცილებელია მხარეებს შორის არსებობდეს გარიგება და ნივთი გადავიდეს შემძენის მფლობელობაში. ამ შემთხვევაში მფლობელობა დასტურდება შესაბამისი გარიგებით და ნივთის ფაქტობრივი ფლობითა და სარგებლობით;</li> <li>• დაწესებულება ვალდებულია, სათანადო წერილობითი მტკიცებულებებით (წერილობითი ხელშეკრულება, მიღება-ჩაბარების აქტი, ანგარიშ-ფაქტურა, ბალანსზე ხანგრძლივი პერიოდით (მინიმუმ ავტორიზაციის მინიჭების ვადით) არსებობის დამადასტურებელი დოკუმენტი, ზეპირად განხორციელებული ჩუქებისას მჩუქებლის წერილობითი დასტური და ა.შ.) დაადასტუროს მოძრავ ნივთებზე მფლობელობის/საკუთრების უფლება;</li> <li>• ხელშეკრულების საფუძველზე, უძრავი ან მოძრავი ქონების მფლობელობის შემთხვევაში, უზრუნველყოფილი უნდა იყოს ავტორიზაციის მინიჭების ვადით;</li> <li>• სასწავლო/სამეცნიერო-კვლევითი ლაბორატორიებში დაცული უნდა იყოს უსაფრთხოების ნორმები.</li> </ul>
<ul style="list-style-type: none"> <li>• შენობა-ნაგებობაში მოწყობილია გამიჯნული სანიტარიული კვანძები, რომლებიც მუდმივად მარაგდება წყლით და სათანადოდ მოწესრიგებულია. სანიტარიულ კვანძებში დაცულია სანიტარიულ-ჰიგიენური ნორმები. სანიტარიულ კვანძები უზრუნველყოფილია უწყვეტი განათებითა და ვენტილაციით;</li> <li>• ყველა სასწავლო ოთახს აქვს როგორც ბუნებრივი, ისე ხელოვნური განათების შესაძლებლობა, გარდა პროგრამის სპეციფიკით გათვალისწინებული სხვა შემთხვევებისა;</li> <li>• შენობა-ნაგებობაში დამონტაჟებულია გათბობის ცენტრალური სისტემა.</li> </ul>
<ul style="list-style-type: none"> <li>• დაწესებულებაში პერსონალისა და სტუდენტთა უსაფრთხოებისა და ჯანმრთელობის დაცვა გულისხმობს: <ul style="list-style-type: none"> <li>o დაწესებულებაში შემუშავებულია ხანძარსაწინააღმდეგო უსაფრთხოების, სამედიცინო დახმარების აღმოჩენისა და წესრიგის დაცვის მექანიზმები და არსებობს შესაბამისი ინვენტარი;</li> <li>o თვალსაჩინო ადგილას, შენობის ყველა სართულზე დამონტაჟებულია ხანძარსაწინააღმდეგო</li> </ul> </li> </ul>

<p>ინვენტარი მისი გამოყენების ინსტრუქციის დეტალური მითითებით და კომპეტენტური ორგანოს მიერ დამტკიცებული საევაკუაციო გეგმები;</p> <ul style="list-style-type: none"> <li>o შენობა-ნაგებობას გააჩნია დამატებითი საევაკუაციო გასასვლელი/გასასვლელები, რომლის კარიც უნდა იღებოდეს შიგნიდან გარეთ და არ შეიძლება იყოს რკინის;</li> <li>o პირველადი სამედიცინო დამხარების აღმოჩენის მიზნით, დაწესებულებას ჰყავს სამედიცინო პერსონალი ან შესაბამისი კვალიფიკაციის მქონე პასუხისმგებელი პირი;</li> <li>o დაწესებულებას აქვს პირველადი სამედიცინო დამხარების აღმოჩენისათვის საჭირო ინვენტარით აღჭურვილი სამედიცინო კაბინეტი ბუნებრივი და ხელოვნური განათებით, ის უნდა ნიავედებოდეს ბუნებრივი წესით და მუდმივად მარაგდებოდეს ცხელი და ცივი წყლით;</li> <li>o დაწესებულება შენობის მთელ პერიმეტრზე უზრუნველყოფს წესრიგის დაცვას;</li> <li>o დაწესებულებას დაცვის ღონისძიებების განსახორციელებლად გამოყოფილი ჰყავს დაცვის თანამშრომლები, რომლებიც დროულად და ეფექტურად რეაგირებენ წესრიგის დარღვევებზე და უზრუნველყოფენ დაწესებულების მატერიალური ფასეულობების დაცვას;</li> <li>o წესრიგის დაცვის მიზნით, დაწესებულებას შენობა-ნაგებობების მთლიან შიდა და გარე პერიმეტრზე დამონტაჟებული აქვს ვიდეოჩანაწერის შენახვის ფუნქციით აღჭურვილი უსაფრთხოების კამერები;</li> <li>o დაწესებულების შენობის მდებარეობა უზრუნველყოფს სტუდენტებისა და აკადემიური/ადმინისტრაციული პერსონალის უსაფრთხო და სწავლისათვის შესაბამის გარემოს.</li> </ul>
<ul style="list-style-type: none"> <li>• სპეციალური საჭიროების მქონე პირს შეუძლია შენობაში თავისუფლად ორიენტაცია და გადაადგილება (მათ შორის: პანდუსები, ლიფტი და სხვა);</li> <li>• სპეციალური საგანმანათლებლო საჭიროების მქონე სტუდენტს წვდომა აქვს პროგრამით გათვალისწინებულ ან ინდივიდუალური სასწავლო გეგმით გათვალისწინებულ სასწავლო რესურსებთან, რომლებიც ადაპტირებულია სსსმ პირების საჭიროებებსა და მოთხოვნილებებზე; ასევე წვდომა აქვს უმაღლესი საგანმანათლებლო დაწესებულებისა და ფაკულტეტის ადმინისტრაციასთან;</li> <li>• სპეციალური საგანმანათლებლო საჭიროების მქონე სტუდენტისათვის არსებობს შესაბამისად მოწყობილი სანიტარიული კვანძი;</li> <li>• შენობის მიმდებარედ არსებობს ავტოსადგომი შეზღუდული შესაძლებლობის მქონე პირთათვის, საიდანაც შეუფერხებლად არის შესაძლებელი შენობამდე მიღწევა.</li> </ul>